

ELOBAY YÂSUUMAAY YATA JESUS KRISTU YA

JOŊ

ANJICUM

Wahaw wammi di kayta'uke

Kayta'uke amakaaw ata Jesus aaneyim Joŋ, anjiicukom. Joŋ oo jûdew, ampawool naaneyim Zebedew. Oo bugoroorabu batawool jambaalaju. Di kayta'uke, Joŋ omu ma âyiisum kaan Jesus oo agam Elobay yata Emitay, yalammi ega ajamaataw ma aali âyiis mâsuumamu mata Emitay, di poop malhegenumaayamu mata yo.

Hurimahu hata Emitay

1 1 Noo di hûcukumahu bala etaamay êwweni, Hurimahu hoo too ban di Emitay kata kaŋ niŋana, ban hoo hugam Emitay. 2 Malhegen noo di hûcukumahu, Hrima'uhu hoo too ban di Emitay, 3 mata hoo ha Emitay êwwenummi wahaw peh. Bajut wah wa Emitay êwwemmi, wâwwentumim Hurima'uhu. 4 Hurima'uhu hohakiim wahaw peh di uroŋ, mata hoo hugam ehikitenumay yata ejamaatay. 5 Ehikitenuma'uyu di ehikiten emuucenay, di ehaat emuucenay.

6 Malhegen âynaaw Emitay ebollom aaneyim Joŋ; 7 âynaw umu, âkayil bi añaanen bukanaku mata ehikitenuma'uyu, ma keeli bi kujamool di kûynen. 8 Be oo agawut ehikitenum, be âkayil ma añaanen bukanaku mata ehikitenuma'uyu. 9 Hurima'uhu, hoo hugam ehikitenumay yalhegenumaayay, yakaylom be ube di etaamay bi ehikiten bukanaku peh kândom. 10 Hurima'uhu hêemiyaaliye di

etaamay, mata hoo ha Emitay êwwenunyom. Be ejamaatay kammi di etaamay kûmirut ho. 11 Mata na hukaylom di êsukay yata yo, bukanaku kata dô di kulat ho. 12 Be bukanaku peh kaanoom aawo, ban di kûynenool, nawuliil buruŋ ma kuga kuŋilaku kata Emitay. 13 Be ntuwa yoo ebajiim non ma ajamaat abajem an, ban ntuwa poop di hunongoor ajamaat, be Emitay egayiim ma kuga kuñool yo.

14 Hurima'uhu hoo hulammi huga ajamaataw, ma akin ta oomaam. Ma ujukaal majaanamu matawool, maamom mata Anilaw anoraw ata Emitay. Ban naan huc kañankiitaku kata Emitay, di poop malhegenumaayamu.

Joŋ Batista nalob mata Jesus

Mat. 3.1-12; Mar. 1.1-8; Luk. 3.1-18

15 Mata Joŋ Batista moo naloom mata Jesus ma âñaanulo âanul: "Anaw oome a iñaanenum matawool, a eenuum mbi asoolhellom ahaŋommi sembe. Mata bala înje

een ibaji, oo bâamiyaliye to ban kata kaŋ niŋana." **16** Ulaal kaŋ peh matawool nubajumaam hûpiiraahu hatumbi hubawrer. **17** Mata Kûboñaku Kapiyaaku, di Moyses kukaymulom; be Kañankiitaku, di malhegenumaayamu, di Jesus Kristu mukayumulom. **18** An ajukurut Emitay, be nujukaale Añool yo anoraw ammi tanor di yo, omagawolaam ûmiraayo.

19 Mata na yahaanay yata jûdewwi kata Jerusaleŋ kubommi bumaanenaabu bata kûboñaku kata Emitay, di bukanaku kata di êbajoorumay yata Levi ma nki kurink Joŋ Batista, di kûriiŋ di keenool: "Kama aw aymoom?" **20** Joŋ Batista âñooroortiil, be nasallheniil ma aaniil: "Înje ntuwa Kristu." + **21** Di keenool: "Kama aw aymoom? Aw pîya Êliyas?" Be Joŋ Batista naaniil: "Iyiy! Înje ntuwa Êliyas!" Di keenool joon: "Kama aw pîya añaanenaaw ata kuboñaku kata Emitay akobeyim d'oo?" Naaniil: "Iyiy, înje ntuwa oo!" **22** Ña di keenool: "Kama ûñaanenioli anaw a aw ugam, ma nki ooli uñaanen bukanaku kâbollolim baabu d'aw. **23** Ña Joŋ Batista naaniil:

"Înje hurimahu hâŋaanuluwem di ekinkay: 'Jilheben buruŋabu be bata Ata Emit, non ma añaanenaaw aaneyim Isayiyas aloom.'" +

24 Bukana'uku kabollim be baabu Joŋ Batista kata di kaasaaku kata

fârisewwi, **25** ña di keenool: "Kama ga jaa non aw ntuwa Kristu, ugawut Êliyas, ugawut poop añaanenaaw ata Kûboñaku Kapiyaaku, moo mata wa ma ubatiisumem di bukanaku?" **26** Ña naaniil: "Malhegen înje ya îbatiisum mumelamu, be aahu omu utu di miwuul a jîmirtum, **27** a mbi asoolhenllom, ban înje igawut anaw ajoone ma ihelh uneewaw wata sikatabasu satawool."

28 Be wahaw uwu di êsukay yata Betaniya ugawim di kareb kaaku kata kaalaku kata Jordoŋ, baamom ba Joŋ Batista ya âbatiisum bukanaku.

29 Kûriiŋ hata kajom, Joŋ Batista nâjukul Jesus oo ma âreesewuum be baabu d'oo, ña naan êsukay: "Jijaa, êgaraniinaay yooye yata Emitay yapasem kûbajumiñaku kata bukanaku kammi di etaamay. **30** Âynaaw oome a ilobuum matawool eenuul, ômasoolhenewuum d'înje âamiyaalitom kata kaŋ niŋana, mata bala înje een îwu, oo too ban. **31** Înje îmirentool, be înje îkayil bi îbatiis bukanaku di mumelamu, ma mbi êsukay yata Israyel keeli kûmirool. **32** Ban naaiil joon: "Nijuke Buynum Bunapaabu ma buwalowulom banaamooruum non êpaakiit ki bulen d'oo. **33** Malhegen înje îmirentool, be Emitay ebollomi ma îbatiis bukanaku di mumelamu, ban di yeenom: "Anaw a mbi ujuk Bûynum Bunapaabu bulen d'oo, noon oo ma mbi âbatis bukanaku di Buynum Bunapaabu.

+ **1.20** Kristu: Di baloberabu bata gregu d'oo dêemom, anaw a Emitay yemmi nbi êboñul.

+ **1.23** Is.40:3

34 Mamakiimom na ijukoom, nîmir kaan oo ma agam Añool Emitay."

**Kumakaaku kûtiyaaraku
kata Jesus**

35 Ban kûriiŋ hata kajom, Joŋ Batista nalaan be ta alakuwemmi koo di kurebooraaku kaaku katawool egaba, 36 be na ajuum Jesus oo ma ahulhem, nâanul: "Jijaa, Êgaraniinaay yooye yata Emitay!" 37 Be na kurebooraaku katawool egabaay kujammi ma aloom umu, ña di kusolhen Jesus. 38 Be na Jesus agalom lhis, najuk kureboora'uku kata Joŋ Batista ma kûsoolhenewuum d'oo, ña narinkiil aaniil: "Kama aymoom a jîpaamem d'oo? Di keenool: "Rabi +, kama ûtay nommi"? 39 Jesus naaniil: "Jîkayil ma ukayaal ma nki jîmir ta emmi!" Ña di kukay ki kûmii'to. Be na kûrimbom, tilay oo ma ahepum ban; ña di kulako to huka'uhu be na tijommi.

40 Di kûynaa'uku egabaay kajammi ma Joŋ aloom di kusoolhen Jesus, aahu naaneyim Andre aamom atiy Simoŋ Pedru. 41 Be na agam nalallo, nasing akay ki añaanjen atiyool Simoŋ, âriŋ naanool: "Simoŋ ûli nujuke jaat Mesiyas" (dâamom Kristu). 42 Ban naŋar atiyool Simoŋ be baabu Jesus, âriiŋ Jesus najikerool, ban naanool: "Aw ugam Simoŋ, jaamom añool Joŋ; mbi ôomi maame Sefas." (dâamom Pedru).

**Jesus nâwool Filipi koo
di Natanayel ma kuga
kurebooraaku katawool**

43 Ban na gam tilay natitijene Jesus nakay be Gâlileya, ña najuk âynaaw aaneyim Filipi naanool: "Filipi bila ma ukaya!" 44 Be Filipi oo ata di êsukay yata Betsayda baamom ba Andre koo di Pedru kuwoom. 45 Ña Filipi najuk Natanayel, nakay ki aanool: "Natanayel, ûli nujuke anaw a Moyses aŋiicum di kaytaku kata Kûboñaku Kapiyaaku matawol; buñaanjenaabu bata Kûboñaku Kapiyaaku, di kuŋiic poop matawool, aamom Jesus, ata Nasare, añool Jose." 46 Ña Natanayel narinkool aanool: "Kama wah wajake pîya weeliye ûcaalhumul Nasare?" Be Filipi naanool: "Bila ma nki ujuk."

47 Na Jesus ajuum Natanayel oo ma âreesewum, naanool: "Âynaaw oome ata Israyel alhegenumaayaw âhooloruworiitum." 48 Natanayel narinkool aanool: "Kama ûtey nûmirommi?" Be Jesus naanool: "Bala Filipi âwooluli, înje bajukeri ban ta uleehom di figera." 49 Na Natanayel naanool: "Rabi, aw Añool Emitay! Aw âyyaw ata Israyel!" 50 Ña Jesus naanool: "Nkit nûynene mata ma eenim nijuki ta uleehom di figera? Ukob, mbi ujuk wah waawu wahammi uwe!" 51 Ban naaniil: "Ma iñaanenuul malhegen eenuul, mbi jijuk hatiya di emitay ma bâbulom ma kumalaakaku kata Emitay ya kûwalowul, di kuŋool hatiya di Añool Ajamaat." +

+ 1.38 Rabi: Dôo dêemom alhikienaaw di lobay yata ebrayku. + 1.51 Hûc. 28:12

Bûyababu bagawim Kanaa

2 1 Ban na gam kukaku kûhaaji, bûyababu di bugawi di jîsukaju jata Kanaa di bantaabu bata Gâlileya. Iñaaw Jesus oo too. 2 Jesus poop koo di kurebooraaku katawool kûwooliwoolim be bûyaba'ubu. 3 Be na bunukabu bugam bubawe, iñaaw Jesus naanool: "Jijaa bunukabu batayiil bubawe ban!" 4 Be Jesus naanool: "Âwo, kama aw mbi ulobom wahaw wa mbi iga? Tûmbaam tîriiŋorut! 5 Be Iñaawool naan kugorooraaku: "Mbi jiga non ma mbi alobuul." 6 Too di bûyaba'ubu, kûwulenumaku koo too hutok di hanor kata kuwaaliisaku dâ jûdewwi kugawem mumelamu mata heenaayahu hata jâbuyooraju di Emitay. Be kûwulenuma'uku keeli kubaj simpaasasu hutok di sîhaaji, be mante simpaasasu kunŋen di sigaba. 7 Ña Jesus naan bugororaabu: "Jimeeŋen kûwulenuma'uku mumelamu!" Ña di kumeeŋen ko huc mumelamu. 8 Ban naaniil Joon: "Jibaj rewoor di kûwulenuma'uku ki jiwul annahaanaw ata bugorooraabu." Ña di kuga mo. 9 Be na annahaanaw umu acombun mumela'umu malaañenim bunukabu, ña nâwoolul ata bûyababu. Be âmirut baaba bunuka'ubu bûcalhumulom, ma bugoroora'ubu keb kûmiim, mata buko kumojulomom. 10 Na âwolloom ban, naanool: "An peh ya aga, wahaw non uwe, nasing âŋarul para bunukabu bâsuumaabu, ma mbi

êasukay ega eyejene, inkit nûŋarul baabu bâsumutaabu. Be aw nuñak para baabu bâsuumaabu be inkit mowme?"


11 Ña nownu, no na Jesus âcukum ma aga miñamu mata sembasu sata Emitay, di jîsuka'uju jata Kanaa di bantaabu bata Gâlileya, ma âyis sembaabsu satawool sata hatiya di emitay. Ña kurebooraaku katawool di kûynenool. 12 Be na gam bûyababu bubawe Jesus koo di kurebooraaku katawool, di iñaawool, di kukay be di êasukay yata Kâfarnawuŋ ki kulako bo kuk.

Jesus nakay be di eluupay yata Emitay

Mt 21.12-17; Mc 11.15-18;

Lc 19.45-48

13 Ban na gam kâlundaayaku kata paskuwa kuhuute, ña Jesus nakay be Jerusaleŋ. 14 Be nârimmi di Eluupay yata Emitay, najuk êasukay koo dôo ma kunoomem di sibaasu, di sîgaraniinaasu, di sîpaakiitasu; buwecekaabu poop bata bancaamabu ma kûleehodom di simeesaasu ma ya kuwecek. 15 Ña Jesus nacoookor hukuwaasaahu hata uneewaw, ban nacak di êasukay peh; nacak poop di sibaasu, di sîgaraniinaasu, ban na atah simeesaasu sata buwecekaabu bata bancaamabu, ma awiis bancaamabu batayiil. 16 Ban naan bunoomaabu bata sîpaakiitasu: "Jîcaalhen ûde wahaw peh wa jinoomem di wo! Atuba jiga eluupay yata ampawoom husiilaayahu!"



17 Ña kurebooraaku katawool di kuwoolho maama ñiicim di elobay yata Emitay kaan: "Mata ma îkimmi eluupay yatayi, ña ya hâahom mata yo." +

18 Ña yahaanay kata jûdewwi di kurink Jesus keenool: "Ûysoli êmanjumay ya mbi êyiis kaan nubaje sembe ma uga ume. 19 Ña Jesus naaniil: "Jîwap jaa Eluupa'uye yata Emitay, înje mbi iteep yo kukaku kûhaaji." 20 Ña di keenool: "Eluupa'uye yateepim ujaañaw bukanaku egaba di hutok di kanor (46), aw mbi ooli uteep yo kukaku kûhaaji? 21 Be Jesus Eluupay yata Emitay ya aloom mata yo, eniilay yatawool. 22 Momakiimom na Jesus alhaalowlom di kuketaaku, kurebooraaku katawool di kuwoolho maama alobeeniim. Ña di kûynen di bañiicerabu bãñooyyaabu, di poop elobay ya Jesus alobiim.

23 Na gam oo boo Jerusaleŋ di kâlundaayaku kata paskuwa, bukan

kameeŋe di kujuk sîmanjumasu sa ya agam, ña di kûynenool. 24 Be Jesus âynentiil mata nâmiriil peh. 25 Mata palimo ma an alobutoom matayiil, be oo nâmiriil mata nâmire hunongoor hata ajamaat.

Nikodemus nakay ki kûjukoorul di Jesus

3 1 Ban fârisew aahu aaneyim Nikodemus agam annahaanaw aahu ata jûdewwi, 2 nakay busonnaaru be baabu Jesus âriiŋ naanool: "Alhikitenawe, malhegen ûli nûmire kaan Emitay ebollim bi ûlhikitenoli elobay yata yo mata an aaliit aga sîmanjumasu sa ugawem, Emitay balee'd'oo" 3 Ña Jesus naanool: "Ma iñaŋeni malhegen eeni, anaw abajulakentim joon, atubi ajuk Kâyyaku kata Emitay." 4 Ña Nikodemus narinkool aanool: "Kama anaw ahallemmi ban, naaliye abajulankeni joon? Soŋo

+ 2.17 Sal. 69:9

pîya iñaawool mbi âkulhoorool joon, ma mbi abajulankenool joon?"
5 Jesus naanool: "Ma iñaanjeni malhegen eeni, anaw abajutumim mumel, di poop Buynumabu bata Emitay, aaliit anebej di Kâyyaku kata Emitay. **6** Mata anaw abajim di kubajaawool, abaji di kabaj ajamaat, be aahu abajumim di Buynum Bunapaabu, oo ata Buynum Bunapaabu. **7** Be atuba ûjaananen mata ma eenim jake noon ma jibajulankeni joon. **8** Mata ehentelaay ya êtekumul ba êkimmi, nujan yo, be ôtukamir ba êcaalhumulom, ban poop ôtukamir ba ereesem be. Moomu poop kaŋ ma bukanaku peh kabajumim Buynum Bunapaabu kugam."

9 Ña Nikodemus narinkool aanool: "Wahaw uwu wa uloom umu, bu mbi uga?" **10** Jesus naanool: "Inja aw alhikitenaaaw ata ûde Israyel, moo unamulent wahaw uwe? **11** Jaa, ma iñaanjeni malhegen eeni, ûli ya ulob wahaw wa ûmiim nûyis poop wahaw wa ujuum, be miwuul jîyneneniit hurimahu hâtooli. **12** Ma ilobewuum mata wahaw wata ube di etaamay jîynent, benkiteemo bi ilobuul mata wata hatiya di emitay, mbi jîynen? **13** Mata an alet aŋoole be hatiya di emitay, be Añool Ajamaat + keb âcaalhumulodom.

14 Mata non ma Moyses ajuumemmi elunay yata muhaañaayamu di ekinkay, moomu poop kaŋ ma mbi

Añool Ajamaat agawi. + **15** Ma mbi ânoowan âynenoom, mbi abaj eron yâbaworiit. **16** Mata Emitay êkinkin ajamaat peh ammi di etaamay, poopii di ewuliil añool yo anoraw, ma mbi an peh âynenoom, atubi anep be mbi abaj eron yâbaworiit. **17** Mata Emitay ebolloot Añool yo be ube di etaamay bi aga ejamaatay batalenabu, be ebollool bi apakeniil.

18 Moo anaw âynenoom, atubi agawi batalenabu. Be anaw âynentoom, mbi ugawi batalenabu, mata âynenet Aŋilaw anoraw ata Emitay. **19** Mata batalenabu boo beemom ube: Ehikitenumay yoo ekaylom be ube di etaamay, be bukanaku kata dô, kuhaŋ mâkin emuucenay mata ma kugawem wahaw wajakutaaw. **20** Mata bukanaku peh kâgawikoorem, kûkinoriit majaanja, ya kulat mo, mata kûkint ma wahaw wa kugawem ujuki. **21** Be bukanaku kagawem wahaw walhegenumaayaw, ya kuga wo di majaanjaamu ma mbi bukanaku kujuk bagawerabu batayiil, mata ya kuga bo non ma Emitay êkimmi."

Jesus koo di Jon Batista

22 Ban Jesus koo di kurebooraaku katawool, di kukay be di bantaabu bata Jûdeya, kûriŋ bo di kulako bo ma ya âbatiis bukanaku. **23** Jon poop nalako Enoŋ ñata di jîsukaju jata Saliŋ, ma ya âbatiis bukanaku, mata mumelamu moo boo huc.

+ 3.13 Dan.7 + 3.14 Num. 21:9

Ña bukanaku ya kûkayil be to ma nki âbatiisiil. 24 Be noo, Joŋ oo basohoruti ki akulhi.

25 Ña kurebooraaku kaaku kata Joŋ, di kuñoosoor di jûdewwi aahu mata jâbuyooraaju di Emitay. 26 Ña di kukay ki keen Joŋ: "Alhikitenawe, âynaaw a jilakom kareb kaaku kata kaalau kata Jordoŋ, omu ma âbatiisem, be bukanaku peh koku ma kukayem be baabu d'oo."

27 Joŋ naniil: "An aaliit abaj wah, Emitay bawulutoo'wo. 28 Miwuul too jilakom na iñaanenuum eenuul, înje ntuwa Kristu, be ibolli ma iyabulool kayooŋ. + 29 Mata âbutuwaaw, âteepikaaw akiloom, be apaal ateepikaaw antom d'oo ya ajam di âteepikaaw umu, mata ya sûmool ajam hurimahu hatawool. Moma êemummi di êsuumay. 30 Mata haŋ majak ma matawool muhaŋ majamo, ma mûmbaam muŋaso.

31 Mata anaw âcaalhumulom hatiya, nahaŋe bukanaku peh. Ata ube di etaamay, ya alob wahaw wata ube di etaam, mata ube di etaamay nawoom. Be aahu âcaalhumulom hatiya di emitay, nahaŋe bukanaku peh, 32 mata ya alob wahaw wa ajuum najam; be bukanaku kûynenoriit hurimahu hatawool. 33 Be anaw âynemmi elobay yatawool, ya asallhen kaan Emitay yoo anaw alhegenumaayaw. 34 Mata anaw a Emitay ebollom, ya alob elobay yata yo, mata ya

ewulool Buynum Bunapaabu baliikut. 35 Emitay êkin kin Añool yo, momakiimom ma êwalenummi wahaw peh di uŋenaw watawool. 36 Moo anaw âynemmi Añool Emit, mbi abaj eroŋ yâbaworiit; be anaw âynentoom, atuba abaj eroŋ yâbaworiit, ban mbi Emitay egawool ma hûlaamahu hulako d'oo be nanooan.

Añakanaw ata Samariya

4 1 Ña fârisewwi di kujam kaan Jesus omu ma agawem di bukanaku ma kuga burebooraabu batawool, ban nâbatiis bukanaku kahammi ka Joŋ âbatiisum. 2 Be di malhegen, ntuwa Jesus ya âbatiisum, be kurebooraaku katawool ko ka ya kâbatiisum bukanaku. 3 Na Jesus ajammom, ña nâcaa'dô Jûdeya, ma alaañ be Gâlileya. 4 Be na mbi aan akay, mbi ayab Samariya.

5 Na ârindom, nakay be di êsukay yaaneyim Sikar, yammi ñata hankahu ha Jako awuum añoolool Jose. 6 Be dôo di hanka'uhu, enkoloŋay dôo ya Jako awokum. Be mata ma Jesus areesulom nagay, ña naleho to ñata enkoloŋa'uyu. Nawnu, jaley ma arem kajuum.

7 Ña añakanaw ata êsuka'uyu yata Samariya, nâkayii'to kamojaaku, ña Jesus naanool: "Atu uwulom mumel isiben?" 8 Be nownu, kurebooraaku katawool koo ma

+ 3.28 Joŋ 1: 21-23

kukayum be di hânkijahu hata dô, ma nki kûnoolomul wahaw wata huriyahu. 9 Ña añakanaw umu naan Jesus: "Aw jagam jûdew, nuga bu ma ulhawom mumel usiben înje jagam samaritaanu?" Ma âlobummom, mata jûdewwi kujamoorut di samaritaanuyi ⁺. 10 Ña Jesus naanool: "Ûmiremme wahaw wa Emitay êkimmi ewuli, di poop anaw aanen d'aw uwulool mumel asiben, mbi ulhaweenuol, ma oo awuli mumelamu magawem an aronj." 11 Be añakanaw umu naanool: "Ma aw ookutum ebaag yata kamoj, ban enkolojow yayu ma êlahum, ûtey ta mbi ûbajumul mumela'umu magawem an aronj? 12 Kama aw nurahere âmpawoli Jako âwalholim enkolojow'uye? Ban koo di kuñoolool dôo kusibemmi, di poop uncaamaw watawool? 13 Jesus naanool: "Anaw asiben jaa mumela'umu, mbi basibenabu buga ban di busohool joon; 14 be anaw asiben jaa mumelamu ma mbi iwulool, basibenabu beetunki busohurerool; mata mumela'umu ma mbi iwulool, mbi muga êbulumay d'oo ya mbi egawool aronj be nanoonan." 15 Ña añakanaw umu naanool: "Uwulom mumela'umu isiben, ma basiben betunki busohurerom, ma etunki îlaañul joon be ute kamoj." 16 Be Jesus naanool: "Ukay ki ûwoolul apañoori, ban nûlaañul be ute." 17 Be añakanaw umu naan Jesus:

"Înje eekut ânniine." Jesus naanool: "Ma uloom umu, nukooje, 18 mata nusoñuweene ban di yîinaay hutok, be aahu a ookum maame, ntuwa apañoori; moo nulobe malhegen."

19 Ña naan Jesus: "Ata Emit, nîyinene kaan aw añaajenaaw ata Kûboñaku Kapiyaaku. 20 Mata sîmpawoli, ute di hurimblina'uhe ya kûnbinkemmi Emitay, be miwuul jûdewwi di jêenul Jerusalej keb boo ba mbi bukanaku kûbiken yo." 21 Be Jesus naanool: "Añakanaye, jake ma ûyinen kaan, hukahu mbi hûriinj na an atubi âbinken ampawom ute di hurimbilina'uhe, palimo poop Jerusalej. 22 Mata miwuul ya jîbinken anaw a jîmirutum, be ûli ya ûbinken anaw a ûmiim, mata kapakaku di bukanaku kagam jûdewwi kûcaalhumulom. 23 Be hukahu hôhareesewuum, ban hûrillo ban, ha bukanaku kâbinkenem ampawom, mbi kûbikenool di buynumabu, di malhegenumaayamu; mata bukana'uku koo ka ampawom apaamem di buko ma mbi kuga bûbinkenaabu batawool. 24 Mata Emitay yoo Buynumabu, moo bukanaku ka mbi kûbinken yo, jake ma kûbinken yo di buyinumabu, di malhegenumaayamu." 25 Ña añakanaw umu naanool: "Înje nîmire kaan Apakenaaw aamom Kristu, mbi âkayil, be na mbi âkayil, mbi añaajenoli wahaw poowo." 26 Be Jesus naanool: "Înje ume jalobem di ume d'aw."

⁺ 4.9 Ed 4.1-5; Ne 4.1-2

27 Ña nownu, kurebooraaku kata Jesus di kûriiŋul. Be na kujuum ma Jesus ya aloom di añakanaw umu, ña di kûjanaŋen noon. Be an arinkutool poop miñamu ma âkimmi di añakanaw umu, makiim ma âlobumem d'oo. 28 Ña añakanaw umu, nawaa'to elompay yatawool ma atey be di hankahu, âriiŋ naan êsukay: 29 jîkayil bi jijuk âynaaw alobommi wahaw peh wa igam. Oo pîya, ntuwa Kristu?" 30 Ña êsukay di êcaalhul be baabu Jesus."

Utondaaw yâyemmi

31 Ña na anñaakanaw umu agam nakaye, kurebooraaku katawool di keenool: "Alhikitenawe, uri." 32 Be naaniil: "Înje nibaje wahaw wa mbi iri wa miwuul jîmirutum." 33 Ña di kurinkoor ma ya kêenul: "Mante pîya an nawulool wah wata huri?" 34 Be Jesus naaniil: "Huriyahu hûmbaam, hoo hugam jagawaju jata wahaw wa anaw abollommi âkimmi, ma iga bugoroorabu batawool. 35 Kama jêenoriit, kulheenaku kurombo kubakiir ma ejalay êriiŋ? Moo neenuul, jîlhaarulo ma jijiker utondaaw wâyemmi ban, wa mbi ejali. 36 Anaw ajalum, mbi ayab bugalabu, ban nâmeb husaanumahu hatawool be eroŋ yâbaworiit ma ajalaaw, di aahu arokum, mbi kûririgen poopiil. 37 Mata jikooŋe hurimahu halobim kaan: 'An aahu mbi arok, aahu najaal.' 38 Moo,

înje mbi iboñuul ma nki jijaal di kalhaakaku ka jiroomiñutum. Mata kaaku kurokum ban, miwuul di jijal wahaw wa kugoroorum."

39 Ña bukan kameeŋe kagam samaritaanuyi kata di êsuka'uyu, mata ma kujammi ma añakanaw umu aaniim Jesus aloboom wahaw peh wagam, ña di kûynen Jesus. 40 Ña di kulhaw Jesus ma keenool alako bo. Ña Jesus nalako bo kukaku kugaba. 41 Bukan kameeŋe poop di kûynen Jesus mata elobay ya alobiim. 42 Ña di keen añakanaw umu: "Mowme, ntuwa mata wahaw wa ûlobolim nûynenummi, mata ûli kûmuumoli nujame ma aloom; moo nunamulene kaan malhegen oo Apakenaaw ata âmbasuk peh."

Jesus nabuunen aŋilaw ata agorooraaw ata âyyaw

43 Na Jesus agabom kukaku kugaba, ban nâcaa'bô ma akay be Gâlileya. 44 Be oo balobereeban kaan añaanena ata Kûboñaku Kapiyaaku, âynenoriiti di êsukay ta awoom. 45 Na ârimmi Gâlileya, bukanaku kata dô di kuyaañuwool sîum, mata na kukayum kâlundaayaku kagawim Jerusaleŋ, di kûjukul wahaw wa agalobom. +

46 Ban Jesus nakay joon be di jîsukaju jammi Kanaa yata Gâlileya, baamom ba abiim bi aŋar mumelamu âlaañenum bunukabu. Be âynaaw oo boo a añoolool âjuutum agam

+ 4.45 Kâlundaayaku kata Paskuwa Joŋ 2: 23

agorooraaw ata âyyaw ata êsukay yata Kâfarnawuḡ. 47 Na ajammi kaan Jesus nâcaalhumulo Jûdeya be dô Gâlileya, ña nakay be baabu d'oo âriiḡ nakaawoorool ma aanool kukay be Kâfarnawuḡ ma nki abuunenool añoolool âjuutum, mata oo ma ma aket. 48 Be Jesus naanool: "Miwuul jijukut jaa êmanjum, di poop miñ mata sembaasu sata Emitay, jîynenoriit." 49 Be âynaaw umu nanool: "Ata Emit, uñankiit ukaya cab kambi añoolom aket." 50 Jesus nanool: "Oot be yanḡi, añooli mbi aroḡ." Ña âynaaw umu nâynen hurima'uhu ha Jesus aloboom ma aat.

51 Be na agam oo makayem, bugororaabu batawool di kûkayiil ki kupam, ma keenool añoolool nâjuwe ban. 52 Ña narinkiil toobu na âjum. Di keenool: "Huken na jaley âkilhom, nâju." 53 Ña ampaw aḡilaw umu, nawolho kaan na jaley aretom huken noo na Jesus aanoom añoolool mbi aroḡ, ña buko peh di eluupay yatayiil di kûynen Jesus.

54 Miñ aw umu mata sembaasu sata Emitay ma Jesus agam, moo mugam mugabutamu ma agam na âcaalhumulom Jûdeya be Gâlileya.

Jesus nabuunen âynaaw agam hubapuwooraahu

5 1 Na gam ban, kâlundaayaku kata jûdewwi di kûriiḡ, ña Jesus nakay be Jerusaleḡ ma nki âami di kâlundaaya'uku. 2 Dôo Jerusaleḡ, humojahu di hûlako dô ñata ta êtingaay yata

sîgaraniinaasu yemmi, haaneyim Betesda di baloberabu bata êbrewwi, habaam uhandaw hutok. 3 Be bukanaku lhay kâjuutum: bûpuumabu, di kata uyakasaw, di poop kubapuwooraaku, koo too ma kulheehom di uhandaw uwu, ma kukob be na mbi mumelamu mugoroor. 4 (Mata ya ga ii, amalaakaw nâwalowul ma aga mumela'umu mugoroor. Ña anaw âjuutum a mbi asing âwalo dô, kâjuutaku kaakoom di kûju.) 5 Be âynaaw too, agam ujaañaw anabawo di kunḡen di hutok di ûhaaji di kâjuutaku. 6 Na Jesus ajuum âynaaw umu ma akumemmi, nâmir kaan napiyuwe di kâjuutaku, ña narinkool aanool: "Nûkine ma ûju?" 7 Ña âynaaw umu naanool: "Ata Emit înje ibajut an a mbi aanenom ma iwalo di humojahu na mumelamu mugoroorem, mata na mbi een iwalo dô, aahu nasinḡom." 8 Ña Jesus naanool: "Ulhaalo ma uḡar hûkumenumahu hatayi ma urees." 9 Ña âynaaw umu nâju to kaḡ cab, ña nalhaalo ma aḡar hûkumenumahu hatawool ma arees. Be huka'uhu, hukahu hata hîyyaayahu hata jûdewwi.

10 Ña yahaanay kata jûdewwi, di keen âynaaw umu abunenim: "Jaat hîyyaayahu hatoolaal, moo ñônñoyi ma upeeno wah non uwu!" 11 Be âynaaw umu naaniil: "Âynaaw abuunenommi aanommi, iralh hûkumenumahu hûmbaam ma irees." 12 Di keenool: "Aymoom aanim

uralh hûkumenumahu hatayi ma urees?" 13 Be âynaaw umu, amanjut anaw abuunenoom, mata ma êsukay yalakotom ememmi noon.

14 Kûriiŋ huk haahu, Jesus di kupam koo di âynaaw umu di Eluupay yata Emitay, ña naanool: "Jijaa! Nibuneni ban, otunki uga hûbajumiñ joon, ka mbi wah wakeel wahammi mâkoji ugawi joon." 15 Ña âynaaw umu nakay ki aloo'mo yahaanay yata jûdewwi aaniil kama Jesus oo ma abuunenoom. 16 Ña yahaanay yata jûdewwi ya kuŋomoor Jesus mata ma abunemmi âynaaw umu di hîyyaayahu hatayiil. 17 Be Jesus naaniil: "Apawom oo ma agoroorem be jaat, înje poop mbi igoroor."

18 Ña mata ma Jesus aloom umu, ña yahaanay yata jûdewwi, di kuhaŋ ma ga sembe ma mbi kubujool; mata ntuwa mata ma ahuusuum keb hîyyayahu hatayiil, be poop mata ma ammi Emitay egam ampawool; ma agaworo non kurewe di yo.

Sembaasu sata Añool Emit

19 Ña Jesus naan jûdewwi: "Ma isallhenuul eenuul, mumulet bi Aŋilaw aga wah oo bajukut Ampawool naga wo. Mata wah kaŋ peh wa Ampawaayaw agam, Añoolool poop naga wo. 20 Mata Ampawaayaw nâkinkin Añoolool, momakiimom nâysool wahaw peh wa agawem. Ban mbi âysool wah waawu wahammi we, wa mbi

ugawuul jîjananen. 21 Mata non ma Ampawaayaw alhaalenem bukanaku di kuketaaku ma agawiil kuroŋ, moomu poop kaŋ ma Añoolool agawem bukanaku ka âkimmi kuroŋ. 22 Ampawaayaw âgaworiit an batalen, be Añoolool nawuum sembaasu ma aga batalenabu. 23 Ma bukanaku peh mbi kujam di Añoolool non ma kujamem di Ampawaayaw. Mata anaw ajamutum di Añoolool, alee'poop ma ajammi Ampawaayaw abolloom.

24 Moo ma isallhenuul eenuul, anaw ajammi hurimahu hûmbaam, ban nâynen anaw abollommi, mbi abaj eroŋ yâbaworiit, mata atubi agawe batalenabu; mata nâtiŋe ban di eketay be di eroŋay. 25 Ma isallhenuul joon eenuul, mbi hukahu hûriiŋ, ban hûriiŋe ban na mbi bukanaku kakeem kujam hurimahu hata Añool Emit; be bukanaku kajaahom, mbi kuroŋ. 26 Mata non ma apawaayaw aakum eroŋay, moomu poop kaŋ ma Añoolool aakuyom. 27 Ban nawulool sembasu sata ma aga atalenaaw ata bukanaku, mata oo agam Añool Ajamaat. + 28 Be atuba jîjananen, mata hukahu mbi hûriiŋ na mbi bukanaku peh kammi di sîluŋasu kujam hurimahu hatawool, di kûlhaalawul, 29 ma kaaku kagam jak, mbi kûlhaalowul di kuketaaku be eroŋay, be kaaku kagam kôji, di kûlhaalowul di kuketaaku be di hûjimenahu hata Emitay.

+ 5.27 Dan. 7:13

30 Be înje humuumahu hûmbaam eeliit iga makeel, mata maama ijammi, moo ma mbi iga batalenabu. Moo batalenabu ba igawem bobu ma bulhebum, mata îgaworiit non ma înje îkimmi, be ya iga non ma Ampawom abollommi âkimmi. 31 Be ga jaa non înje ya iloboro mûmbaam, non kama wahaw wa ilobewuum, ntuwa malhegen. 32 Mata aahu, omu to aloben mûmbaam, be înje nîmire kaan wahaw wa alobem mata înje, malhegen. 33 Mata na jibommi bukanaku be baabu Jon, nalobulobuum malhegen. 34 Be ntuwa kaan înje îkimmi ma an alob mûmbaam, be ilobuul umu ma mbi jeeli jipak. 35 Mata Jon oo agam poop non ehikitenumay yayabenim ma jaan, be miwuul di jîkin ma jîririgen jinjet di majaanamu mata yo. 36 Be ma malobim mata înje, muhanje mata Jon; mata bugoroorabu ba ampawom awulommi bi iga, boo ba igawem di bo, ma yîis kaan oo abollommi. 37 Înje Ampawom abollommi, oo aloom mata înje, be miwuul jijamorut nakeel hurimahu hatawool, ban poop jîmirut haanaahu hatawool. 38 Ban poop hurimahu hatawool hulee'di miwuul, mata jîynent anaw abolloom. 39 Ban ya jisaaho ma jipisen Banjicerabu Bañoayaabu, mata ma jinongum kaan mbi bugawuul jiron be nanonon, mata mata înje buloom. 40 Be miwuul jîkint jîkayil be baabu d'înje ma mbi jibaj eronay.

41 Înje îpaamoriit ma bukanaku kusalom, 42 be nîmiruul jak mata jîkint Emitay. 43 Înje îkayumul mata ampawom, be jîkintom; be ga jaa non anaw aahu akayoorowulom, mbi jiyabeenool. 44 Kama bu mbi jeeli jîyinen, ban miwuul ya jîkin keb jisaloorowaaju, ma jiwaa'bo kasalaku ka Emitay yanoray esalem an? 45 Be atuba jêenul înje mbi iwuusuul di ampawom, be anaw a mbi awuusuul, Moyses aamom a miwuul jîynemmi. 46 Mata gaween jaa non di malhegen jîyneneene elobay yata Moyses, mbi jîyneneenom poop, mata, mata mûmbaam nâñiicunyum. 47 Be jîyinent jaa maama anjicunyum, bu mbi jîyinen elobay ya ilobem di miwuul?

Jesus nawul êsukay kuri

Mat. 14.13-21; Mar. 6.30-44; Luk.

9.10-17

6 1 Ban Jesus nâtip hulhuwahu hata Gâlileya, haaneyim poop Tiberiyadis. 2 Be buyoonjabu bata bukanaku di busoolhenool, mata ma kujuum ma ya agam miñamu mata sembaasu sata Emitay, ma ya abuunen bukanaku kâjuutum. 3 Na Jesus di kuñool di hurimbiliñahu koo di kurebooraaku katawoo, ki kuleeho dô. 4 Nownu kâlundaayaku kata jûdewwi, + kaaneyim Paskuwa koo ma kuhuutum. 5 Be na Jesus agam lhâar, najuk buyoonjabu bata bukanaku ma kûkayewuum be baabu d'oo, ña naan Filipi: "Ûtey

⁺ 6.4 Ex. 12

mbi unoomulaal kûmburuwaaku bi bukana'uke kuri?" 6 Be ma aloboom umu, oo âkimmi alasuwool, mata oo bâmiree'ban maama mbi aga. 7 Ña Filipi naanool: "Palimo bancaamabu bârimmi sîteemeerasu sigaba bata prata, ma bunoomumi kûmburuwaaku, ketubi kutook ma ânoowan abaj jitij." 8 Ña aahu ata di kurebooraaku katawool aaneyim Andre agam atiy Simoŋ Pedru, naanool: 9 "Ampa oome ute abeam kûmburuwaaku hutok kata sevada, di poop muwolamu mugaba; be bu keelim kugawi di buyooŋa'ube?"

10 Be ma tiŋa'utu tigam mahosamu lhay, ña Jesus naaniil kuga êsukay peh ma eleeho. Ña yîinaay di kuleeho kaalim kûriiŋ sînjunaasu hutok. 11 Ña Jesus naŋar kûmburuwaa'uku ma asal Emitay, ban nâgiiter ko bukanaku peh kalakotom. Ban naga mo poop muwola'umu. Ña êsukay peh, ânoowan nari non ma âkimmi. 12 Na kugam kupooñe, ña Jesus naan kurebraaku katawool: "Jikay ki jîjoobenul bâmonkabu bata kûmburuwaaku baŋaŋunom ma betuba bukaaño." 13 Ña di kûjoobenuu'bô, di kumeenjen sîkutasu kunŋen di sigaba sata bâmonkabu bata kûmburuwaa'uku hutokay kata sevada ka kurim di kuŋañen.

14 Ña na êsukay kujuum êmanjumay ya Jesus agam, ña di kêenul: "Âynaaw ume, malhegen oo añaanenaaw ata Kûboñaku Kapiyaaku a mbi âkayil be di etaamay. 15 Be ma Jesus âmiim

kaan êsukay kûkine ma kusohool ma kûyyenool, ña nâcaa'to ma akay diyoonool be di hurimbiliŋahu.

Jesus narees di hulhuwahu

Mat 14.22-33; Mr 6.45-52

16 Na tigam ma tijon, kurebooraaku kata Jesus di kuriinjen be di hulhuwahu. 17 Na kûrimmi, di kûjupo di busaanaabu ma kûtip be Kâfarnawuŋ. Ña nownu too ma tigam kîin, be Jesus oo bakayoloot bi atookii'to. 18 Ehentelaay di êteku, di sembe, ña hulhuwahu di hugor. 19 Be na kugam kuweene kûriiŋ sikilometerasu hutok, be mante hutok di yanor, di kujuk Jesus reeken oo ma âreesewuum di mumelamu, ña di kuwollo. 20 Ña Jesus naaniil: "Jetuba jîkoli, înje." 21 Ña di kuyaañuwool di êsuumaay; ña di kûriiŋ ta kureesem be.

Jesus hûburuwaahu hagawem an aroŋ

22 Na titijemmi, buyooŋa'ubu bata bukanaku kalakonom kajim kaaku kata hulhuwa'uhu, di kûmir kaan busaanaabu banor bulakotom kareba'uku, ban Jesus âjupowut dô, ma kurebooraaku katawool keb kôkajupodom. 23 Ña usaanaaw waawu wâcaalhumulom Tiberiyadis, di ûriiŋul di uya ñata ta buyooŋa'ubu bata bukanaku kemmi katokommi kûmburuwaaku na Jesus asalum Emitay. 24 Be na kûmiim kaan Jesus koo di kurebooraaku katawool kulee'to, ña di kûjupo di wo ma kukay ki kupaamool Kâfarnawuŋ.



25 Na kûrimbom di kujukool, ña di keenool: "Alhikitenaawe, toobu nûrillom ube? " 26 Be Jesus naaniil: "Ma isallhenuul eenuul, ma jipaamumem d'înje, ntuwa mata ma jijuum sîmanjumasu sa igam, be mata ma jirilom kûmburuwaaku ii di jipooñ. 27 Jetuba jiroomiñ mata muriyaay akaañuwem, be jiroomiñ be bata maama mbi mulako to be eronj yâbaweriitaay, ya mbi Añool Ajamaat awuluul, mata Emitay yaamom ampawool, yoyu ma egawoom êmanjumay." 28 Ña di kurink Jesus keenool: "Buroomiñ bu, ba Emitay êkim ûli uga?" 29 Ña Jesus naniil: "Wahaw wa Emitay êkimmi jiga, jîynen anaw a yoo ebollom." 30 Di kurinkool joon keenool: "Êmanjum bu mbi uga, ma ûli mbi ujuk, nûyneni? Wa nugawem? 31 Mata sîmpawoli kapiyaaku manaa + kurim di ekinkay, non ma elobay yata Emitay eloom kaan, yoo ewuliim hûmburuwaahu hâcaalhumulom

hatiya di emitay." 32 Be Jesus naaniil: "Ma isallhenuul eenuul, ntuwa Moyses awuluum hûmburuwaahu hâcallhumulom hatiya di emitay; moo haahu halhegenumaayahu hata hatiya di emitay, Ampawom mbi awuluu'ho. 33 Mata hûmburuwaahu hata Emitay, hoo hugam anaw âcaalhumulom hatiya di emitay, a mbi aga âmbasuk peh aronj." 34 Ña di keenool: "Ata Emit, mbi ûwuloli di hûmburuwaa'uhu nanonon."

35 Be Jesus naaniil: "Înje igam hûmburuwaahu hagawem an aronj, anaw âkayil jaa be baabu d'înje, atubi acaareturer; anaw poop âynenommi, basiben betubi busohurerool. 36 Mata înje niñaagenuu'ban, be palimo ma jîjukem di înje, be jîynentom. 37 Mata anaw a Ampawom awulommi, mbi âkayil be baabu d'înje. Ban anaw a mbi âkayil be baabu d'înje, malhegen etubi ilaturerool. 38 Mata înje îcaalhumuloot hatiya di emitay, bi iga non ma îkimmi, be îkayil bi iga

+ 6.31 Ex. 16:4-16; Sal. 78:24; 105:40

non ma anaw abollommi âkimmi. 39 Mata Ampawom abollommi, wahaw wa âkimmi, ma bukanaku peh ka awulommi ketuba kunep, ma mbi ilhaalelliil di kuketaaku di hukahu hûbanumahu. 40 Malhegen Ampawom, wahaw wa âkimmi, ma an peh ajuum Añoolool, ban nâynenool, mbi abaj eroŃ yâbaworiit; ban di hukahu hûbanumahu, mbi ilhaalellool di kuketaaku."

41 Ña jûdewwi, ya kûŃuŃunoor mata ma Jesus ammi oo hûmburuwaahu hâcaalhumulom hatiya di emitay. 42 Ban ya kêenul: "Kama ume ntuwa Jesus aamom añool Jose? Kama ûmirutaal ampawool, di iñaawool? Moo, mata wa ma aanumem di mo, oo hatiya di emitay nâcaalhumulom?"

43 Be Jesus naaniil: "Jetuba jîŃuŃunoor. 44 Mata an mumulet bi âkayil be baabu d'înje, Ampawom abollommi baŃallootool; ma mbi ilhaalellool di kuketaaku di hukahu hûbanumahu. 45 Mata dôdu ma Ńiicim di uytaw wata buñaañenaabu bata Kûboñaku Kapiyaaku kaan, + Emitay mbi elhikiten an peh. Momakiim an peh atallhemmi Ampawom, ban nanamulen, mbi âkayil be baabu d'înje. 46 Mata an akeel ajukeenorut Ampawom; be anaw âcaalhumulom di Emitay keb, ajukoom. 47 Ma isallhenuul eenuul: "Anaw âynenommi, mbi abaj eroŃ yâbaworiit. 48 Mata înje igam hûmburuwaahu hagawem an aroŃ.

49 Mata simpawuul, manaa kurim di ekinkay, be ban di kuket. 50 Be hûmburuwaahu hâcaalhumulom hatiya di emitay, an peh atokonhom, atubi aketurer. 51 Mata înje igam hûmburuwaa'uhu haroŃaahu hâcaalhumulom hatiya di emitay, moo anaw atokonhom, atubi aketurer be nanoonan. Mata hûmburuwaa'uhu ha mbi iwul âmbasuk peh ma kuroŃ, eluway yûmbaam."

52 Ña jûdewwi, di kuga to bûñoosoorabu ma ya kurinkoor kêenul: "Bu mbi oo awulolaal eluway yatawool utokoñaal?"

53 Be Jesus naaniil: "Ma isallhenuu eenuul: "Jitokoñut jaa eluway yata Añool Ajamaat, ban jisibent poop hûsimahu hatawool, jetubi jiroŃ. 54 Mata anaw atokommi eluway yûmbaam, ban nasiben hûsimahu hûmbaam, mbi abaj eroŃ yâbaworiit, ban mbi ilhaalellool di kuketaaku di hukahu hûbanumahu. 55 Mata eluway yûmbaam, yoo wahaw wata huriyahu walhegenumaayaw; hûsimahu hûmbaam poop, wahaw wata basibenabu walhegenumaayaw. 56 Moo anaw atokommi eluway yûmbaam, ban nasiben hûsimahu hûmbaam, mbi âami di înje, ban înje poop mbi êemi d'oo. 57 Mata non ma Ampawom abollommi ammi ma arommi, moomu poop kaŃ ma înje emmi ma irommi matawool. Moomakiimom, anaw a mbi atokoñom, mbi aroŃ mata

+ 6.45 Is.53:13

înje. **58** Moo ûde hûmburuwaahu hâcalhumulom hatiya di emitay; hunaamoorut di mana ya simpawuul kurim ban kukete ban. Be uhe, anaw atokonhom, mbi aroŋ be nanoonan."

59 Na Jesus aloom umu oo ma alhikitenem di bukanaku di eluupay yata kâmebooraku yata Kâfarnawuŋ.

Burebooraabu kameeŋe bata Jesus, di kuteyool

60 Ña burebooraabu kameeŋe kata Jesus, di kujam ma ya aloom umu, ña di kêenuul: "Hurima'uhe hûsumut kajam, mumulet bi an aali atallhenool." **61** Be ma Jesus âmiim kaan kurebooraaku katawool koku ma kûŋuŋunoorem, ña narinkiil aaniil: "Kama jîkine jilaañ kujeenanda mata hurima'uhe ha iloobuum? **62** Kama nokoor jaa non miwuul jijukemmi Añool Ajamaat oo ma akayem be hatiya di emitay da âcaalhumulom, bu mbi jigaween? **63** Buynumabu bata Emitay bugawem an aroŋ. Mata ajamaataw di humuumahu hatawool keb, aaliit aga makeel. Moo elobay ya ilobuum, êkayumul di Buynum Bunapaabu, yawulem eroŋaw. **64** Be bukan kaaku di miwuul, kulee'ma kûynenommi." Mata Jesus nâmiraaliye bukanaku ka mbi kûynenool, di poop kaaku katumbi aŋoonool. **65** Ban naanil joon: "Momakiimom ma eenumuum, mumulet bi an âkayil be baabu d'înje, ampawom baanentool ma âkayil.

66 Ña burebooraabu katawool kameeŋe, di kulaañ kujeenanda, ma kulaañut joon kureboor d'oo. **67** Ña Jesus narink buku kagam kunŋen di egabaay ma aaniil: "Miwuul poop jîkine ma jiteyom?" **68** Be Simoŋ Pedru naanool: "Ata Emit, uteyi jaa, mbi ureboor d'ay? Ban aw ookum elobay yagawem an aroŋ be nanoonan. **69** Ûli nûynene, ban nûmire kaan aw anaw Anapaaw ata Emitay." + **70** Jesus narinkiil aaniil: "Kama ntuwa miwuul jeemo kunŋen di egaba ka ijotum? Be aahu ata di miwuul Esatanaay." **71** Be oo malobem mata Judas Iskariyotis, aamom añool Simoŋ a mbi aŋoonool, agam ata di buku kunŋenay di egabaay.

Kutiy Jesus kûynentool

7 **1** Ban Jesus yareesoor dô keb Gâlileya, ma alaañut joon be Jûdeya, mata ma jûdewwi kambom kûkimmi kubujool. **2** Be noo, kâlundaayaku kata jûdewwi kaaneyim Kâlundaayaku kata Ûngungaw, + koo ma kuhuutum. **3** Ña kutiy Jesus di keenool: "Ûcaalh ute, ma ukay be Jûdeya ma nki kurebooraaku katayi kujuk wahaw wa ugawem, **4** mata anaw âkimmi ma bukanaku kûmirool, aŋoororiit wahaw wa agawem. Moo, ma gam mo ma ugawem, ukay ma nki êsukay peh kujuki." **5** Be wahaw wakiim kutiyool

+ **6.69** Mat.16:16; Mk.8:29; Lk.9:20 + **7.2** Lv.23:34-43;Dt.16:13-15

di kûlobumool umu, mata ma kûynentoom. 6 Ña Jesus naaniil: "Înje hukahu hûmbaam hûriŋorut, be di miwuul, huk kaŋ peh hujake. 7 Ban miwuul bukanaku kammi di etaamay kûbirikoriit di miwuul non înje, mata ma ilobeyiim wahaw wajakutum wa kugawem.

8 Moo, miwuul jikay be kâlundaaya'uku, înje eetut bo, mata hukahu hûmbaam hûriiŋorut." 9 Na alobiim umu ban, ña nalako dô Gâlileya.

Jesus nakay be kâlundaayaku kata Ūngungaw

10 Na kutiy Jesus kugam kukaye be kâlundaaya'uku, ban Jesus poop nakay be bo, be agawut ma êsukay kûmii'mo. 11 Be na gam kâlundaayaku koku dô, jûdewwi ya kupaamool, ban ya kurinkoorool ma kêenul: "Kama âynaaw umu omu ûtey?"

12 Be di buyooŋa'ubu balakotom, bukan kameeŋe ya kûŋuŋunoor noon matawool, ma kaaku ya kêenul: "Âynaaw umu oo an ajake bûyeget." Be kaaku di kêenul: "Âynaaw umu ya abunten bukan." 13 Be palimo ma bukanaku ya kuloom umu matawool, be an asoken aloo'mo way, mata ma kûkolim yahaanay yata jûdewwi.

14 Be na kâlundaayaku kugam kurewe tutaru, Jesus nanebej di Eluupay yata Emitay ma nki alhikiten êsukay. 15 Ña jûdewwi di kûjanaŋen mata balhikitenerabu batawool, ña

ya kêenul: "Kama âynaaw ume, bu nagawe ma âmir ume eloba'uye an balhikitentoo'yo?"

16 Be Jesus naaniil: "Balhkitenerabu ba ilhikitenem di bo bukanaku, ntuwa bûmbaam, be bata anaw abollommi. 17 Mata anaw âkimmi aga non ma Emitay êkimmi, mbi anamulen mante balhkitenera'ube bata Emitay, mante bûmbaam humuumom. 18 Mata anaw âkinem ma bukanaku kusalool, ya alob matawool, be aahu âkinem ma bukanaku kusal anaw abolloom, anaw umu oo anaw alhegenumaayaw, ban agawut an agugujoore. 19 Kama Moyses awulutuul Kûboŋaku Kapiyaaku? Be miwuul kaŋ peh jîgaworiit non ma kuboŋa'uku kuloom! Kama mata wa ma jîkimmi jibujom?"

20 Ña buyooŋa'ubu bata bukanaku di keenool: "Âynaaye, aw amalaw omu ma âjupuwim! Kama ay ammi mbi abuji?" 21 Ña Jesus naaniil: "Miŋamu mata sembaasu sata Emitay nigam, miwuul peh di jîjanaŋen. + 22 Inja miwuul ya jisoolhen kuboŋaku ka Moyses awuluum, ma ya jiga balaabu huhaanaahu hata yîinaay di hukahu hata hîyyaayahu hatawuul, ban ntuwa Moyses âcukuhom, be simpawool sihaan. 23 Jiga jaa balaabu huhaanaahu hata yîinaay di hukahu hata hîyayahu hatawuul, ma jisoolhen kûboŋaku ka Moyses awuluum, moo mata wa di jibrik d'înje mata ma ibuunemmi anaw di hukahu hata

+ 7.21 Joŋ 5:1-18

hîyyaayahu hatawuul? **24** Atuba mbi ya jiga batalenabu, di jiga ejuu di buul, be mbi ya jiga bo jak.

Kama Jesus agam Kristu?

25 Ña bukan kaaku kata Jerusaleñ di kurink ma kêenul: "Kama ntuwa âynaaw ume oo ma kupaamem d'oo ma mbi kubujool? **26** Inje omalobem di ume ta êsukay yemmi, ban an alobutool makeel? Kama saño pîya yahaanay yata êsukay keene ban aawo di malhegen oo agam Kristu? **27** Ban âynaaw ume ûli nûmire ba awoom! Inje Kristu na mbi âkayil, an atubi âmir baaba mbi âcaalhumul."

28 Be na Jesus ya alhikitemmi bukanaku di Eluupay yata Emitay, ña nâñaanulo ma âanul: "Malhegen jîmirom, ban jîmire poop ba îcaalhumulom. Be înje ikayorowloot, be anaw abollommi oo anaw alhegenumaayaw a miwuul jîmirutom. **29** Be înje nîmirool mata d'oo nîcaalhumulom, oo abollommi."

30 Ña di kûkin ma kusohool, be kubajut kugawool mata ma hukahu hatawool hûriiñutum. **31** Be bukan kameeñe kata di buyooña'ubu di kuynenool, ban di kêenul: "Soño pîya na mbi Kristu âriiñul, mbi ahañ ma ga âynaaw ume miñamu mata sembaasu sata Emitay?"

Bupooyaabu di kuboñi ma nki kûsohul Jesus

32 Be na fârisewwi kujammi ma êsukay ya kuloom mata Jesus, ña

di kubom di bumaanenaabu bata kûboñaku kata Emitay ma kuboñ bupooyaabu bata Elupay yata Emitay ma nki kusohulool. **33** Be Jesus naaniil: "Jaa înje mbi ilako ute di miiwuul haahe, ban nkit nikay be baabu di anaw abollommi. **34** Be mbi jipaamom, jetubi jijukom, mata ba mbi ikay be, miwuul jeeliit jikay bo. **35** Ña jûdewwi ya kurinkoor ma kêenul: "Kama ûbey pîya mbi akay be, ba ulaal otubi ujukumaalool? Soño pîye mbi akay ki atoo'bo kutiyoolaal kammi ma kuwaasoorum di bâsukabu bata bukanaku kagawtum jûdewwi ma nki alhikitenii'bo? **36** Kama mata wa pîya ma aanumem di mo, mbi upaamaalool otubi ujukaalool, nâanuul poop ba areesem be, ulaal oolitaal ukayaal be bo?"

Jesus nâanul oo agam mumelamu magawem an aronj

37 Be di hukahu hûbanumahu hagam hukahu hâmakaaahu hata kâlundaaya'uku, ña Jesus najuum ma alob lhîñña ma âanuul: "Anaw a basibenabu busoom, nâkayil be baabu di înje ma asiben. **38** Anaw âynenommi non ma Bañicerabu buloom, uyelenooraaw wata mumelamu magawem an aronj, mbi ûcaalhumul hîndena d'oo ma ya utey."

39 Be Jesus oo ma alobem mata Buynum Bunapaabu ba bukanaku peh kâynenoom mbi kuyab. Mata noo

Buynum Bunapaabu, boo bayaboruti, mata Jesus oo bâyyenoruti. ⁺

Êsukay di kuga waasaaw

40 Na êsukay kujammi ma aloom umu, ña bukan kameeje kata di buko di keenul: "Malhegen âynaw ume añaanenaaw ata Kûboñaku Kapiyaaku." 41 Kaaku di kêenul: "Âynaaw ume Kristu." Be kaaku di kurink ma ya kêenuul: "Kama Kristu mbi âcaalhumul Gâlileya? 42 Kama bañiicerabu beenut Kristu mbi abaji di êbajoormay yata David, di jîsukaju jata Belej, baamom ba David awoom? 43 Ña êsukay di kûgiitoor mata Jesus, 44 ña kaaku di kûkin ma kusohool, be an asohutool.

Yahaanay Sûumutiil di Jesus

45 Na bupooyaabu bata Eluupay yata Emitay kulallom, ña yahaanay yata Kûboñaku Kapiyaaku, di fârisewwi di kurinkiil keeniil: "Kama mata wa ma jîŋalloomum âynaaw umu?" 46 Di keeniil: "Âynaaw umu an alet âwoosiye elob non oo!" 47 Ña yahaanay di keeniil: "Kama miwuul poop di jiwalhoo'bo ma abuntenuul? 48 Saño jijuke pîya an d'ûli jagam yahaanay âynenoom? 49 Be êsuka'uye ma kûmirutum Kûboñaku Kapiyaaku, Emitay egawii'ban kupaawo." 50 Be aahu ata di buko aaneyim Nikodemus, abiim bi akay ki kujukoor di Jesus, naaniil:

51 "Kama kuboñaku katoolaal mo ma kuloom kaan nooliye oon an nabaje hûbajumiñ aw barinkutool ma ûmir wahaw wa agam?" ⁺ 52 Ña di keenool: "Kama aw poop jata Gâlileya? Upisen ma Bañiicerabu Bañoayaabu, mante mbi ujuk takeel ta bemmi añaanenaaw ata Kûboñaku Kapiyaaku nâcaalhello Gâlileya?" 53 Na kuloom umu ban, ña di kuwaasoor ma keet.

Añakanaw a kusoom bata Kakumenaku

8 ¹ Ban Jesus nakay be di hurimbiliŋahu hata Oliveyra. ² Bûjomaru bîb, nâlaañul be di Eluupay yata Emitay. Ña êsukay peh di kûkayil be baabu d'oo, ña naleeho ma ya alhikiteniil. ³ Ña bulhikitenaaabu bata Kûboñaku Kapiyaaku, di fârisewwi, di kûkayil di añakanaw a kusoom bata kakumenaku, kûriiŋul di kujuumenool tutaru tatayiil, ⁴ ban di keen Jesus: "Alhikitenaaawe, añakanaw ume oo asohulim bata kakumenaku. ⁵ Be di kûboñaku kâtooli, Moyses naane anñaakanaw agam non ume, mbi amabi kuwaaliisaku ma abuji. Moo aw, bu nuloom?" ⁶ Be ma kûlobummom mata ma kûkimmi kûhopool ma mbi keeli kûsohumoo'to. Be Jesus nâsik ma ya âñiicum husikahu di etaam.

⁺ 7.39 Jesus oo bâyyenoruti: Nownu Jesus oo balañorut be hatiaya di Emitay (Joŋ 16:7;14:16,17). ⁺ 7.51 Joŋ 3: 3- 21

7 Be mata ma ya kûnjiinooroom ma ya kûrinkool, ña nalhaalo ma ajuum, ban naaniil: "Di miwuul jammi ute, nokoor jaa non anaw omu ute abajutum hûbajumiñ, nasiñ amabool huwaaliisahu." 8 Ban nalaan joon âsik ma ya âñiicum husinkahu di etaam. 9 Be na kujammi ma alobiim umu, ña di kuga anor anor ma kuwaasoor. Be karaheem kusingum kukay, ma Jesus kulako to keb di añakanaw umu. 10 Be na Jesus alhaallom ma ajuum, ajukutiil ma ajuu'to keb añakanaw umu. Ña naronkool aanool: "Añakanaye, kama bukanaku kammi kakumenaku nukayum bûkookey? An aanuti mbi kubuji? 11 Be naanool: "An alobutom mo." Jesus naanool: "Palimo poop înje, etubi eeni mbi ubuji. Be otuba mbi uga joon kûbajumiñ."

Jesus ehikitenumay yata etaamay

12 Ban Jesus nalaan joon alob di êsukay ma aaniil: "Înje ehikitenumay yata etaamay; anaw asoolhenom jaa, atubi arees di emuucen; mata mbi abaj ehikitenumay yagawem an aron." 13 Ña fârisewwi di keenool: "Aw ya ulob matayi, momakiimom elobay ya ulobem di yo, ebajut sembe."

14 Be Jesus naaniil: "Palimo înje ilobe mûmbaam, elobay ya ilobem, elhegenumaayay, ban yoyu ma ebaam sembe, mata înje nîmire ba îcaalhumulom, ban poop nîmire ba ikayem be. Be miwuul jîmirut

ba îcaalhumulom, jîmirut poop ba ikayem be. 15 Mata miwuul ya jiga batalenabu non ma ejamaatay egawem, be înje îgaworiit an batalen. 16 Be palimo înje igawe an batalen, mbi buga batalenabu balhegenumaayabu, mata îgaworiit batalen an înje diyoonom, be ya iga bo ûli di Ampowom abollommi. 17 Mata dôdu ma ñiicim di kuboñaku katawuul kaan, bukan egaba kulob jaa wahaw wanoraw, nûmir kaan wahaw uwu wa kuloom, walhegenumaayay. 18 Înje ya ilob mûmbaam, Ampawom poop abollommi, ya alob mûmbaam."

19 Ña di kurikool keenool: "Kama ampayi omu ûtay?" Jesus naaniil: "Ma miwuul jîmirutommi, bu mbi jîmir ampawom? Mata jîmirom jaa, mbi jîmir poop ampawom."

20 Na Jesus ya aloom eloba'uyu, oo di Eluupay yata Emitay ma alhikitenem di êsukay ñata ta ekeesay yata oferta yemmi. Be an asohutoo'no mata hukahu hatawool hoo bâriiñorut.

Jesus aymoom?

21 Ban Jesus naaniil joon: "Înje mbi ikay, mbi jipaamom, be mbi jiket di kûbajumiñaku katawuul mata binabu ba ikayem be, jetubi jeeli jikay be bo." 22 Ña yahaanay yata jûdewwi, ya kurinkoor ma kêenul: "Kama ma aanem di mo, binabu ba akayem be, ulaal mumulet bi ukayaal be bo, soño pîya ma mbi abujooro?" 23 Be naaniil joon: "Miwuul jata ute di etaam, be înje jata hatiya. Miwuul

di etaamay jiwoom, be înje iwolhut ute. **24** Momakiimom ma eenumuum mbi jiket di kûbajumiñaku katawuul. Malhegen mbi jiket di kûbajumiñaku katawuul, mata jîynet kaan ÎNJE IGAM ÎNJE." **25** Ña di kurinkool keenool: "Kama aw ay?" Be Jesus naaniil: "Kama bu nilobuum kâtiyaar mata înje?" **26** Malhegen nibaje wah wameeje wa îkimmi ilobuul matawuul, di poop waawu wameeje wa mbi igawuul batalenabu; mata anaw abollommi, oo anaw alhegenumaayaw. Moo wahaw wa ijamem d'oo, woowu keb wa ilobem âmbasuk peh."

27 Be buko kunamulent kaan omalobem di buko mata Emitay, yaamom Ampawool. **28** Ña naaniil: "Na mbi jilhaalen Añool Ajamaat, mbi jîmir kaan ÎNJE IGAM ÎNJE, ban îgaworiit wah wakeel di hunongahu hûmbaam, be ya ilob non ma Ampawom alhikitenommi. **29** Mata anaw abollommi, omu d'înje. Moo âwalhoriitom bo diyoonom, mata ma igawem wahaw wâsuumewoom."

30 Ña na aloom umu, bukan kameeje di kûynenool.

Bukanaku kagam emiikeelay

31 Ban Jesus naan jûdewwi kâynenoom: "Jenken jaa ma jisoh elobay yûmbaam, mbi jiga burebooraabu bûmbaam balhegenumaayabu; **32** ban jîmir jaa malhegenumaayamu, malhegenumaaya'umu di mumelhenuul." **33** Be di keenool: "Ûli jata di êbajoorumay yata

Abrawoŋ, ûli ugawurerut emiikeel yata an. Moo mata wa ma oonumem d'ûli, malhegenumaayamu mbi mûmelhenoli?" **34** Be Jesus naniil: "Ma isallhenuul eenuul, anaw abajem kûbajumiñ, oo amiikeelaw ata kûbajumiñaku. **35** Mata amiikeel, âlakuworiit di eluupay yata anaw akiloom be nanooan. Be aŋilaw awoom di eluupay, ya alako dô be nanooan. **36** Moo Aŋilaw amellhenuu'jaa, mbi jimelh di malhegenumaayamu. **37** Înje nîmire kaŋ jak kaan, miwuul jata di êbajoorumay yata Abrawoŋ. Be palimo moo, miwuul ma paamem ma mbi jibujom, mata elobay ya ilobewuum jîgaworiitu'yo di uynumaw watawuul. **38** Mata înje ya ilob wahaw wa ijukulom baabu di Ampawom, be miwuul ya jiga waawa jijuum di ampawuul. **39** Ña di keenool: "Ûli âmpawoli, Abrawoŋ." Be Jesus naaniil: "Nokoor jaa non miwuul kuñool Abrawoŋ, mbi ya jigaween non ma oo agawem. **40** Ban jîkine ma jibujom înje jalobuum malhegenumaayamu ma ijumulom di Emitay. Kama Abrawoŋ mo ma agawem? **41** Miwuul ya jiga non ma ampawuul agawem." Na di keenool: "Ûli ampawaayaw anor nubaam, aamom Emitay. Ugawut bukan kaakutum ampawaay.

42 Jesus naniil: "Nokoor jaa non miwuul kuñool Emitay di malhegen, mbi jîkineenom, mata înje di Emitay nîcaalhumulom, momakiimom ma êemummi ute; ban ikaymuloot mata înje, mata yoo ebollommi. **43** Kama

mata wa ma jînamulentummi wahaw wa ilobuum? Jinamulent, mata jîkint jijam wahaw wa ilobewuum. 44 Miwuul ampawuul diyabu mo ma jîkinummi jiga wahaw wa oo âkimmi. Mata oo abujaaw kata kañ niñana, ban âloboriit malhegen, mata malhegenumaayamu mulee'd'oo. Momakiimom na mbi alako nacal, nalob non ma oo aanom, mata oo agugujooraw, ban poop oo ampaw macalamu. 45 Be mata ma înje ilobewuum malhegen, momakiimom ma jîynentumommi. 46 Aymoom ata di miwuul aalim aanom nibaje hûbajumiñ? + Moo, ilobuul jaa malhegen, mata wa ma jîynentumommi? 47 Mata anaw agam ata Emitay, ya atallhen elobay yata yo, be miwuul jîkint jitalhenom mata jigawut bukanaku kata yo."

Jesus nahaje Abrawoñ

48 Be jûdewwi di keenool: "Momakiimom ûli nukooñe ma oonumim, aw Samariya nuwoom, ban amalaw koku d'aw." 49 Be Jesus naaniil: "Înje eekut amal. Înje ya ijam di ampawom, be miwuul ya jirembeelom. 50 Înje îpaamoriit ma kusalom, be anaw omu to agawem ma kusalom, ban oo agawem batalenabu be bata înje. 51 Ma isallhenuul eenuul anaw asoom elobay yûmbaam, atubi aketurer." 52 Ña jûdewwi buku di keenool: "Mowme nkit nûmire kaan

kumalaku koku d'aw. Mata Abrawoñ, di poop buñaañenaabu bata Kûboñaku Kapiyaaku, kukeekeem; be aw noone anaw asoom elobay yatayi atubi aketurer. 53 Kama aw nuhañe âmpawoli Abrawoñ akeem? Nuhañe poop buñaañenaabu bata Kûboñaku Kapiyaaku kakeem? Kama noone aw an bu?" 54 Be Jesus naaniil: "Nokoor jaa non înje ya isalooro, kasala'uku kujaakut. Be înje Ampawom asalewommi, aamom a jeenem oo agam Emitay yatwuul. 55 Ban jîmirutool, be înje nîmirool. Mata eenuu'jaa îmirutool, non mbi igugujoor non miwuul. Mata ma îmiroom, ya iga non ma alobewommi. 56 Mata Abrawoñ aamom ampawuul, sûmosuumoom noon na ajuum hukahu ha mbi îkayumul. Mata na ajuuhom, nâririgen noon." 57 Ña di kurinkool keenool: "Ma aw ugaworutum ujaañaw kûyyaku kugaba di kunñen, nuga bu maujuk Abrawoñ?" 58 Be Jesus naaniil: "Malhegen neenuul, bala Abrawoñ abaji, ÎNJE IGAM ÎNJE." +

59 Ña di kûkin kumabool kuwaaliisaku, be Jesus nâñooro dô di Eluupay yata Emitay, ban nâcaalh ma akay.

Jesus nabuunen âynaaw âwum di bâpuumerabu

9 1 Na Jesus agam oo ma areesem ma akay, najuk âynaaw âwum

+ 8.46 Jesus nâkine aaniil, mante keeliye kubaj anaw aalim âanul wahaw wa alobem di wo, ntuwa malhegen? + 8.58 Ex.3:14

di bâpuumerabu. 2 Ña kurebooraaku katawool di kurinkool keenool: "Alhikitenawe, kama âynaaw ume oo abaam hûbajumiñahu be mante kubajaawool, makiim ma âwuwummi di bâpuumerabu?" 3 Be Jesus naaniil: "Ntuwa mata hûbajumiñahu hatawool, ntuwa poop mata hata kubajowool, be âwu mo ma mbi Emitay êyiis sembaasu sata yo d'oo. 4 Moo, jake ma ugawaal bugoroorabu bata anaw abollommi mata tiroŋ di tititijen, mata tôtareesewuum ma mbi tijon na an atubi aali agoroor. 5 Be ma gam niroŋe ute di etaamay, ïnje igam ehikitenumay yata yo.

6 Na aloom umu, ban nacuh di etaam ban nasiw ko ma aga jikapaju, ban naŋaa'jo asaas di kûkilaku kata âynaaw umu. 7 Ban naanool: "Ukay ma nki ûbuuhul di humojahu hata Silowe." (Dâamom wahaw wabollim). Ña âynaaw umu nakay ki âbuuhul di humojaa'uhu, ña nâlaañumuu'bo oo ma âjum ban.

8 Na bukinooraabu batawool, di bukan kaaku kajukewoom bata kalhawaku kata esarahay di kêenul: "Kama ntuwa âynaaw ume oo ma aleehuem ma ya alhaw esarahay ? 9 Kaaku di kêenul: "Oomu kaŋ." Be kaaku di kêenul: "Ntuwa oo, âynaaw ume kunaamoor d'oo." Be âynaaw umu naaniil: "Ïnje kaŋ." 10 Ña di kurinkool keenool: "Kama bu nugawe ma kûkilaku katayi kûju? 11 Naaniil: "Âynaaw a keenem Jesus oo ma asiiwum jikapaju, ban nasaasom jo

di kûkilaku, ban naanom ikay ki ïbuuhul di humojahu hata Silowe. Ña nîbuuhul, nîju." 12 Di kurinkool joon keenool: "Âynaaw umu omu ûtey?" Naaniil: "Ïnje ïmirut ba ammi."

Fârisewwi di kurink âynaaw âpuumemmi

13 Ña di kuŋar âynaaw umu âpuumemmi be baabu fârisewwi. 14 Mata di hukakahu hata hîyyayahu hata jûdewwi no na Jesus agam jikapaju, ma âbuunenum jo kûkilaku kata âynaaaw umu. 15 Ña fârisewwi poop di kurinkool maama agam ma kûkilaku katawool kûju. Naaniil: "Oo asiiwum jikapaju, ban naŋaa'jo asaas di kûkilaku kûmbaam, ña nîbuuhul nîju."

16 Ña fârisewwi kaaku di keenool: "Âynaaw umu ntuwa an ata Emit, mata nahuusule hukahu hata hîyyayahu hatoolaal." Be bukaaku di kêenul: "Kama ajamaat agawem kûbajumiñ, naaliye aga miñamu mata sembaasu sata Emitay non ma âynaaw umu agam? Ña di gûitoor dô ma kuga waasaaw. 17 Ban di kurik joon âynaaw umu âpuumemmi ma keenool: "Aw bu nunongum mata âynaaw umu agawim ujuk?" Naaniil: "Âynaaw umu añaanenaaw ata Kûboñaku Kapiyaaku."

18 Be yahaanay yata jûdewwi di kêenul, mumulet bi kûynen kaan âynaaw umu nâpuumenpuumemmi, buko bâwolloot kubajaawool. 19 Na kûwollim di kurinkiil keeniil: " Âynaaw ume añooluul a kemmi

di bâpuumerabu nabajim? Moo bu nagawe ma ajuk?" 20 Ña kubajaawool di keeniil: "Malhegen ume añoololi, di bâpuumerabu nubajoom, 21 be ûli ûmirut maama agam ma ajuk, ga jaa non anaw agawoomom, ûli ûmirut. Be ma gam oo annahaanaw, jirinkool ma mbi añaanenuul." 22 Be wahaw wakiim kubajaawool di kûlobum umu, mata ma kûkolim yahaanay yatayiil, mata buko baanee'ban anaw a mbi aanul Jesus agam Kristu, mbi kucah d'oo di eluupay yata kâmebooraku katayiil. 23 Momakiimom ma kubajaawool kêenumiim ma gam oo annahaanaw nagam kurinkool.

24 Ña fârisewwi di kurink joon âynaaw umu âpuumemmi ma keenool: "Ulob malhegen kayoon di Emitay. jaa, ûli nûmire kaan âynaaw umu anaw agawem kûbajumiñ." 25 Be âynaaw umu naaniil: "Ga jaa non âynaaw umu ya aga kûbajumiñ, înje îmirut. Be miñamu ma înje îmiim, înje nîpuumempuumemmi, be jaat nijuke." 26 Di kurikool joon keenool: "Kama bu nagawe ma agawi ma ûju?" 27 Naaniil: "Inja niñaanenuu'ban, jîynent. Mata wa ma jîkimmi iñaanenuul joon? Kama miwuul pîya jîkine jiga kurebooraaku katawool?" 28 Na alobiim umu, ña di kugelool ma keenool: "Aw kañ ugam arebooraaw atawool. Ûli kurebooraaku kata Moyses. 29 Mata ûli nûmire kaan Emitay elooloom di Moyses, be âynaaw umu, ûli ûmirut ba awoom."

30 Ña âynaaw umu naaniil: "Beeh, mûpuñuneniye! Jeene jîmirut baaba awoom? Be oo agawommi ijuk. 31 Mata ulaal nûmiraale kaan Emitay êjaamoriit bukanaku kagawem kôji, be ya ejam kaaku kajamem di yo, ban di kuga non ma yoo êkimmi. 32 Ban kata kan niñana na etaamay ecookoorim be jaat, ujamorutaal an agawe an abajim di bâpuumerabu ajuk. 33 Moo, âynaaw umu agawent jaa anaw ata Emitay, atubi aaliyeen agaween makeel." 34 Ña di keenool: "Aw jabajim di kûbajumiñaku, aw mbi ûlhikitenoli?" Ña di kucah d'oo ma âcaalh di eluupay yata kâmebooraku katayiil.

Bukanaku kahammi mâpuum

35 Ban Jesus najam kaan fârisewwi kucahe di âynaaw umu. Be na kupammi d'oo, narinkool aanool: "Aw nûynene Añool Ajamaat?" 36 Âynaaw umu naanool: "Annahaanaw, anaw umu ôomey, ma îynenool?" 37 Ña Jesus naanool: "Nujukoo'ban, oo ma jilobem di ume!" 38 Ña âynaaw umu naanool: "Ata Emit, nîyneni." Ban nâtiigen ma âbinkenool.

39 Ña Jesus naanool: "Înje, înje ikaylom be ube di etaamey bi iga bukanaku batalenabu, ma kaaku kâpuumum kujuk, kaaku kajuum, di kûpuum." 40 Be na fârisewwi kalakotom kujammi ma Jesus aloom umu, ña di keenool: "Soño kama ûli poop, ûli umu ma ûpuumum?" 41 Naaniil: "Miwuul jîpuumen

jaa, jetubi jibajeen kûbajumiñ, be ma jemmi miwumu ma jijukem, ña mbi jilako to di kûbajumiñaku katawuul."


Jesus âtekenaaw alhegenumaayaw

10 1 Ban Jesus naaniil joon: "Ma isallhenuul eenuul, anaw anebejutum di êtingaay yata bubababu bata hûtekenahu hata sîgaraniinaasu, ma âyuurumul tiŋ taatu, oo âkuutaaw, ban oo âlhapitaaw. 2 Be anaw anebeem di êtingaay, oo agam âtekenaaw ata sîgaraniinaasu. 3 Apooyaaw ata êtingaay nâbabul âtekenaaw, sîgaraniinaasu di sijaam hurimahu hatawool, di simaj ho. Ban nâwoo'so yanooyan di kañaanaku kata yo, ma âcaalhul di so be tîyaŋ. 4 Na mbi âcaalhul di so tîyaŋ, nayaa'so kayoon; soo di sisoolhenool, mata ya simaj hurimahu hatawool. 5 Be sîsoolheneriit anaw a sîmirutum, mata mbi ya siteyool ma sîmirutum hurimahu hatawool." 6 Be palimo ma Jesus añaanemmi fârisewwi

kaliikuma'uku, be kunamulent wahaw wa âkimmi alobiil.

7 Ban Jesus naaniil joon: "Ma isallhenuul eenuul, înje igam êtingaay yata bubababu bata hûtekenahu hata sîgaraniinaasu. 8 Be kaaku peh kasingulommi kûkayil, buko peh bûkuutaabu, ban buko poop bûlhapiitaabu, sîgaraniinaasu sîtallheneriitiil. 9 Înje igam êtingaay, anaw anebeem d'înje, mbi apak. Mbi aga non êgaraniinaay ya mbi ênebejul, ban êcaalh, di ebaj mûheniinaayamu lhay ehen. 10 Mata âkuutaaw ya âkayil keb bi âkuut, nabuj, nakajen. Be înje, înje ikaylom bi iga so siuroŋ, ma siroŋ di kâsuumaayaku.

11 Ban naaniil joon: "Înje âtekenaaw âsuumaaw; mata âtekenaaw âsuumaaw ya âketum mata sîgaraniinaasu satawool. 12 Be anaw âtekenem keb ma mbi kuncaamool, agawut âtekana; sîgaraniinaasu sîmirutool mata akiit so. Na mbi enjiiriŋay êkayil bata so, natey ma abee'so ma esoo'so, di siwaasoor. 13 Malhegen anaw ammi ma âtekenem keb mata bancaamabu, mbi atey. Mata



letubi laañool mata sîgaraniinaasu. **14-15** Înje âtekenaaw âsuumaaw. Non ma Ampawom âmirommi, mo ma înje poop kaŋ îmiroom. Nîmir poop sîgaraniinaasu sûmbaam, soo poop di sîmirom. Moo îkoliit kaket mata so. **16** Be sîgaraniinaasu saasu sosu bo saleem ûde di hûtekena'uhe. Moo, jake ma ibom so tanor, ma iga so di hûteken hanor, di sibaj poop âtekanaaw anoraw, ma mbi ya sijaam hurimahu hûmbaam.

17 Momakiimom ma ampawom âkinumommi, mata îkoliit kaket, ban nilaañ joon îroŋul. **18** Înje an aaliit abujom, be înje îkimmi ma mbi kubujom. Mata nibaje sembe ma îkin ma kubujom, nibaje poop sembe ma ilaañ joon îroŋul; mata mo ma Ampawom aboñumulommi bi ga."

19 Na jûdewwi kujammi ma aloom umu, ña di kuga to bûñoosoorabu. **20** Ña bukan kameeŋe ya kêenul: "Ume kumalaku koku d'oo, omu ma awuutom. Mata wa ma jitallhenumem d'oo?" **21** Ña bukan bukaaku di kêenul: "Balobera'ube bunaamoorut di bata an a kumalaku kemmi d'oo. Kama amal, naaliye aga an âpuume ma ajuk?"

Êsukay di kulat Jesus

22 Di êsukay yata Jerusaleŋ kâlundaayaku kata buyintenabu bata Eluupay yata Emitay, ⁺ di kuga no. Be nawunu kûwaagenaku. **23** Na

Jesus ya areesoor dô di Eluupay yata Emitay di buhandabu bata Salomoŋ. **24** Ña jûdewwi di kuŋoomenool ma kurinkool keenool: "Ûnew mbi ûloboli salh ma ûmir mante aw kaŋ Kristu, ma otuba umantir?"

25 Be Jesus naaniil: "Înje niñaanenuu'ban, be jîynent. Be wahaw wa igawem di kañaanaku kata Ampawom, ûyisem mûmbaam, **26** be miwuul jîynet mata jigawut sîgaraniinaasu sûmbaam. **27** Mata sîgaraniinaasu sûmbaam, înje nîmii'so, ya sijaam hurimahu hûmbaam, ban ya sisoolhenom. **28** Înje mbi iga so siroŋ be nanoonan, ban setunki sinepurer, mata an aaliit abot so di uŋenaw wûmbaam. **29** Mata Ampawom awulonsom, sembaasu satawool, sihaŋe sembe peh; momakiimom an aaliit abot so di uŋenaw watawool. **30** Mata ûli di Ampawom, anaw anoraw."

31 Ña di kûŋarul joon kuwaaliisaku ma kûkin kumaboo'ko. **32** Be Jesus naaniil: "Kuk kameeŋe, ya iga wahaw wajakaaw ta jemmi wa Ampawom abollommi bi ga. Moo, wah bu wata di wo wajakutum wakiim wa mbi jîmabumom kuwaaliisaku?" **33** Ña di keenool: "Ntuwa mata wahaw uwu wajakaaw, wo wa mbi umabumi kuwaaliisaku, be mata ma ûgelikoorem di Emitay. Mata aw jagam ajamaataw, ma oonem di mo, aw Emitay.

⁺ **10.22** Buyintena'ubu, kuga bo ma mbi ya kuwollho na Eluupay yata Emitay elammi eyinteni na Êsukay yata Siiriya kusikuyom di kajaanaaku kata 164 AC (bala Kristu). Moo ute, koo kugam kâludaaya'uke, ma keeli kuwollho huka'uhu.

34 Be Jesus naaniil: "Kama lee'ma ñiicim di kûboñaku katawuul kaan, Emitay yeene, miwuul simitasu? + 35 Kama Emitay êwoo'jaa ejamaatay ka yoo ebollom elobay yata yo, ma yêenul buko simitasu, ban nûumiraale kaan elobay yata Emitay malhegen; 36 bankiteemo ñnje ja Ampawom agawommi anaw anapaaw, ban nabollom be ube di etaamay, di jêenul ñigelikoore Emitay mata emmi ñnje Añool yo? 37 Gaween jaa non igawut bugoroorabu ba ampawom abollommi bi ga, ña atuba jîyneneenom. 38 Be ma gam ñnje ma gawem di bo, palimo ma jîynentommi, be di jîyneneen bugoroora'ubu, ma mbi jinamulen, di jîynen kaan Ampawom omu di ñnje, ñnje poop, ñnje omu d'oo."

39 Ña nki di kûkin joon kusohool, be namellh di buko. 40 Ban Jesus nalaañ joon be kareb kaaku kata kaalaku kata Jordoŋ ba Joŋ ya âbatiisum bukanaku kâtiyaar, âriiŋ nalako bo. 41 Be bukan kameeŋe ya kukay ki kutookoo'bo, ban ya kêenul: "Malhegen Joŋ, agawut êmanjum yakeel. Be wahaw peh wa aloom mata âynaaw ume, malhegen." 42 Ña bukan kameeŋe kakayum be bo, di kûynenool.

Eketay yata Lasaru

11 1 Be âynaaw aahu nâjuut aneyim Lasaru ata di jîsukaju

jata Betaniya. + Baamom Mariya koo di Marta, kaamom kûliinool kukimmi. 2 Mariya umu, oo abiim bi asaas Jesus eheñay di ulehetaw, ban nâbeesum wo walaw watawool. + 3 Ña kûliinool buku egabaay, di kuboñ ki keen Jesus: "Ata Emit, apaali Lasaru a uboolaatum âjuut." +

4 Be na kuloomom Jesus, ña nâanul: "Kâjuuta'uku untuwa kata eket, be kata ma mbi Emitay esali, Añool Emit poop, nasalumi to." 5 Malhegen Jesus naboolaatboolaat Marta, di atiyool, di poop Lasaru. 6 Be na ajammi kaan Lasaru âjuut, na lako bo para kukaku kugaba. 7 Ban naan kurebooraaku katawool: "Ulañaal joon be Jûdeya." 8 Kurebooraaku katawool di keenool: "Alhikitenaawe, ñnje piyowut na na jûdewwi kûkimmi kumabuli kuwaaliisaku, nki nulaañ joon be bo?" 9 Be Jesus narinkiil aaniil: "Kama hukahu hubajut siwooraasu kunŋen di sigaba? Anaw areesum tutulaaru mumulet bi âpungulho, mata omajukem majaanamu. 10 Be anaw areesum busonnaaru, mbi âpungulho mata jaanjut. 11 Ban naan kurebooraaku katawool: "Apaalolaal Lasaru, omu ma aŋotum, ukayaal ma nki itonkool." 12 Be Kurebooraaku katawool di keenool: "Ata Emit ga jaa non omu ma aŋotum, kama mbi âju." 13 Na Jesus ya aloom umu, oo ma alobem mata eketay yata Lasaru, be kurebooraaku katawool di gawiil

+ 10.34 Sl. 82: 6 + 11.1 Betaniya: Jîsukaju jammi di bantaabu bata Jûdeya, ñata Jerusaleŋ + 11.2 Joŋ 12:3 + 11.3 Nownu Jesus oo di bantaabu bata Gâlileya.

non omu ma alobem mata kaŋotŋot. **14** Ña Jesus nasallheniil jak ma aaniil: "Lasaru nakete ban, **15** be nîririgene mata ma ilakowututom ma mbi jeeli jîynen; moo ukayaal be bo!" **16** Ña Tome aaneyim poop Magabaamu, naan kupalool: "Ukayaal poop ma nki uketaal tanor d'oo."

Jesus nalob mata jalhaalaaju jata di kuketaaku

17 Na Jesus ârimmi di jîsuka'uju jata Betaniya, najam kaan Lasaru nagawe ban kukaku kubakiir di êluŋay. **18** Ban ebankay yata Betaniya di Jerusaleŋ, yeeli êriiŋ sikilometerasu sîhaaji. **19** Na jûdewwi kameeŋe, di kukay be bo ki kûlobul di ñikulañu ñata Marta koo di Mariya. **20** Na Marta ajammi kaan Jesus ômareesewuum, ña nâkayil ki kupam. **21** Âriiŋ naanool: "Ata Emit, non aw umuyeen ute, âliinom atubi aketeen. **22** Be palimo ma gam ume, nîmire kaan wahaw peh wa mbi ulhaw Emitay, mbi ewuli wo."

23 Ña Jesus nanool: "Âliini mbi âlhaalowul di kuketaaku."

24 Be Marta nanool: "Înje nîmire kaan mbi âlhaalowul di kuketaaku di hukahu hûbanumahu."

25 Ña Jesus nanool: "Înje alhaalenaaw ata kuketaaku, înje igawem an aroŋ. Anaw âynenommi, palimo oo akeem, mbi aroŋ. **26** An peh arommi, ban nâynenom, atubi aketurer. Nûynene?"

27 Ña Marta nanool: "Ata Emit, nîynene! Nîynene kaan aw Kristu,

aanom Añool Emitay a mbi âkayil be ube di etaamay."

Jesus nakaaw Lasaru

28 Na aloom umu, ban nakay ki âwoolul atiyool Mariya âriiŋ di kulob diyooniil ma aanool: "Alhikitenaaaw omu ute, ômawoolem d'aw."

29 Na Mariya ajammi ma aloboom umu, ña nañaaah cab ma akay ki atoo'bo Jesus. **30** Be Jesus oo banebejorut di hankahu, oo baroŋ ta kupammi di Marta. **31** Ña jûdewwi kalakotom di Mariya di eluupay ma ya kûtikenool, na kujukoom ma alhaalom cab ma âcaalh, ña di kusoolhenool ma kêenul mante omakayem ma nki akaaw di êluŋay.

32 Be na Mariya ârimmi ta Jesus ammi ajukool, ña nalo to di ûkandumaw watawool, ban naanool: "Ata Emit, non ute nulakuwemmi, âliinom atubi aketeen."

33 Na Jesus ajukoom ma akaawem, koo di jûdewwi ka kureboorlom, di mulaañool, ña nañankiit noon.

34 Ña narikiil aaniil: "Kama ûtay jihokoom?" Di keenool: "Bila ki ujuk."

35 Ña Jesus nakaaw.

36 Ña jûdewwi di kêenul: "Jijuke non ma âkinoom!"

37 Be bukaaku di kurik ma ya kêenul: "Inja oo agam âynaaw âpuumaaw ma ajuk, moo aaliit poop agaween Lasaru ma atuba aket?"

Lasaru nâlhaalowul di kuketaaku

38 Ban Jesus nalaañ joon añankiit; ña nakay be di êluŋay. Be êluŋa'uyu

yoyu ma ewokim non kâgoboŋ, ban di kuŋar huwaaliisahu hâamak kûbaahenum êtingaay yata yo. **39** Ña Jesus nâaniil: "Jîcaalen huwaaliisahu." Be Marta âliin aketaaw naanool: "Ata Emit, ehuluŋaayay ekaaŋuwe ban, mata egawe ban kukaku kubakiir."

40 Be Jesus narinkool aanool: "Kama eenuti ûynen jaa, mbi ujuk sembaasu sata Emitay?"

41 Na kûbaahuum êluŋay, ña Jesus nalhag be hatiya, ban nâanul: "Ampoom nisali noon mata ma ujamommi."

42 Nîmire kaan ya ujamom huk peh, be ilobi ume mata buyooŋa'ube bata bukanaku kammi ute, ma mbi keeli kûynen kaan aw ubollommi."

43 Na aloom umu ban, ña nâŋaŋulo ma âanul: "Lasaru, ûcaalhul be tîyaŋ."

44 Ña aketaaw nâcaalhul, be uŋenaw di ûkandumaw watawool woo ma ubooŋenim kukokaaku, buulabu batawool poop boo ma bubaahenim eleesaay. Ña Jesus naaniil: "Jihellool ma mbi aali arees."

Jûdewwi di kûkin kubuj Jesus

Mat. 26.1-5; Mar. 14.1-2; Luk. 22.1-2

45 Ña bukanaku kameeŋe kagam jûdewwi kakaylom ki kulob di Mariya, di kujuk wahaw wa Jesus agam, di kûynenool.

46 Be bukan kaaku kata di buko di kukay ki kuŋaŋen fârisewwi wahaw wa Jesus agam. **47** Ña yahaanay yata

bumaanenaabu bata kûboŋaku kata Emitay, di fârisewwi, di kûwool Hulhanahu Hâmakaahu, + ban di kurinkoor ma ya kêenul: "Bu mbi ugawaal, ma âynaaw ume agawem di ume miŋamu lhay mata sembaasu sata Emitay? **48** Uwalhaaloo'bo jaa, bukanaku peh mbi kûynenool, ban romanuyi mbi kuyab d'ulaal Eluupay yata Emitay, di poop etaamay yatoolaal.

49 Ña aahu ata di buko aaneyim Kayfas, aganom annahaanaw ata bumaanenaabu bata kûboŋaku kata Emitay di kajaaŋa'uku, naaniil: "Miwuul jîmirut makeel! **50** Kama jinamulent kaan haŋ majak ma an anor aket mata êsukay, ma atuba bi bukanaku peh kûbuyo. **51** Malhegen Kayfas, hurima'uhu ha aloom ntuwa hatawool, be mata ma aganom annahaanaw ata bumaanenaabu bata kûboŋaku kata Emitay, mo ma Emitay êgawummi hurima'uhu di butumabu batawool, mâanul Jesus mbi aket mata êsukay. **52** Be ntuwa keb mata êsukay, be ma mbi âmeb ejamaatay kammi ma kuwaasoorum tiŋ peh, ma agawiil an anoraw.

53 Ña di huka'uhu, ya kupaam ma mbi kuga ma kubujool. **54** Momakiimom ma Jesus âlaaŋutummi joon arees way ta jûdewwi kemmi, ma akay be di jîsukaju jaaneyim Efrayin, jata di bantaabu bagam ekinkay bantom reeken, ki kulako bo koo

+ **11.47** Hulhanahu Hâmakaahu, Jerusaleŋ bo ba hugaweyiim.

di kurebooraaku katawool. **55** Be kâlundaayaku kata jûdewwi kaaneyim Paskuwa, koo ma kuhuutum ban. Ña bukan kameeṅe kata di bantaa'ubu, di kukay be Jerusaleṅ ki kûbuyoor di Emitay bala kâlundaaya'uku kûriiṅ. **56** Be ma ya kupaammi Jesus, ña ya kurinkoor di Eluupay yata Emitay ma ya kêenul: "Bu jinongum? Soṅo pîya, mbi âkayil kâlundaaya'uke?" **57** Be yahaanay yata bumaṅenaabu bata kûboṅaku kata Emitay, di fârisewwi, koo ma kemmi ban, anaw a mbi âmir ta Jesus ammi, nañaṅeniil ma mbi kusohool.

Jesus oo Betaniya

Mat. 26. 6-13; Mar. 14. 3-9

12 **1** Na ṅañunom kukaku hutok di hanor ma Paskuwa êriiṅ, Jesus nakay be Betaniya baamom ba Lasaru awoom a alhaalellom di kuketaaku. **2** Na ârimbom, di kûlewool sisonna. Be Marta oo ma ya agabiim, ma Lasaru kuri koo di Jesus. **3** Ña Mariya naṅar karaahaaku kata eheeṅay yata nardu yalhegenumaayay, yaputum sûum, ban di eseer noon, âyu di ûnkandumaw wata Jesus, ban nâbeesum wo walaw watawool. Ña eluupay pooyo, di eput sûum. **4** Be aahu ata di kurebooraaku katawool aaneyim Judas Iskariyotis, agam ban naṅoon Jesus, narik âanuul: **5** "Kama mata wa ma eheeṅa'uye enoomutumim sîteemerasu sîhaaji sata prata bi uwulaal kûsukateenaku?" **6** Be Judas

ma âlobumom, ntuwa mata ma añankiitum kûsukateenaku, be mata ma agam âkuutaaw, ban oo asohem jimbootaaju jata bancaamabu, ya âkuut baaba kûgawedom. **7** Ña Jesus nâanul: "Jiwalhoo'bo; mata nañake eheeṅa'uye be nata hulhiimenahu hûмбаам. **8** Mata mbi jilako tanor di kûsukateenaku be nanoonan, be înje otubi ulakuwaal tanor be nanoonan."

9 Ña na jûdewwi kameeṅe kûmiim kaan Jesus omu dô, ña di kûkayil be to, be ntuwa keb mata Jesus, be poop mata jajukaju jata Lasaru a alhaalellom di kuketaaku. **10** Ña yahaanay yata bumaṅenaabu bata kûboṅaku kata Emitay, di kunuur mata jabujaju Lasaru; **11** mata ma jûdewwi kameeṅe kûynemmi Jesus matawool, ma kuwalhi'bo.

Jesus na nebej Jerusaleṅ

Mat. 21.1-11; Mar. 11.1-11

Luk. 19.28-40

12 Na tilay atitijemmi, buyooṅabu bata bukanaku kakaylom Paskuwa di kujam kaan Jesus ômakayeyuum be kâlundaayaku Jerusaleṅ. **13** Ña di kuṅar ugasaw wata sibekelasu ma kucâalh ki kupam d'oo, ban ya kûṅaṅulo ma ya kêenuul: "Osana! Usalaal âyyaw ata Israyel akaylom di kañaṅaku kata Ata Emit!"

14 Na najuk jimbaamaju, nageelo jo non ma demmi ma enjiici kaan:

15 "Êsukay yata Jerusaleṅ,
+ atuba jîkoli,

⁺ **12.15** Di uyit waawu di kuga kañaṅaku kata Siyoṅ.

mata âyyaw atawuul oome ma ageelowlom jimbaamaju!"

16 Be nownu kurebooraaku katawool kunamulent wahaw uwu, be na Jesus âyyenim, ña nkit di kuwollho kaan maama kugawoom, moomu kaŋ ma muŋiicim matawool.

17 Bukanaku kalakotonom na Jesus alhaalellom Lasaru di kuketaaku ma agawool âcaalhul di êluŋay, di kuyeenen mo di êsukay kaan Jesus alhaalellom Lasaru di kuketaaku.

18 Momakiimom na kujammi kaan mo ma Jesus agam miñamu mata sembaasu sata Emitay, ña buyooŋabu bata bukanaku di kûcaalhul ki kupam d'oo. 19 Ña fârisewwi di kêenul: "Jijuke, mowme ooliitaa'ban ugawaal makeel, mata êsukay peh kukaye ban kujeeŋandawool."

Bukan kaaku kagam gregu di kûkin kujuk Jesus

20 Be di bukana'uku kakayum ki kûbinken Emitay di huka'uhu hata kâlundaayaku, bukaaku kaaku kugawut jûdewwi. 21 Ña di kukay ma nki kujukoor di Filipi +, ata di êsukay yata Betsayda yata bantaabu bata Gâlileya, kûriiŋ di kulhawool ma keenool: "Annahaanaw, ûli nûkineujuk Jesus." 22 Ña Filipi nakay ki aloo'mo Andre, ña buko egabaay di kukay ki kuloo'mo Jesus. 23 Ña Jesus naaniil: "Malhegen tîriiŋe

ma Añool Ajamaat âyyeni. 24 Ma isallhenuul eenuul, hûsepeyahu hata emaanaay hulo jaa di etaam, ban hûpumbuloot, di hulako to diyonho, be hûpumbuu'jaa, mbi huwolh sututut. 25 Anaw âkimmi eroŋay yatawool, mbi âbuu'yo, be anaw alatum eroŋay yatawool ute di etaama'uye, mbi abaj eroŋ yâbaworiit. 26 Anaw âkimmi agoroorom, nasoolhellom, mata ta înje mbi ilako, agororaaw umu poop ûmbaam, mbi alako to. Moo, anaw agoroorommi, Ampawom mbi asalool.

Jesus nalob mata eketay yatawool

27 Mowme bûyegetabu bûmbaam bulee'ma bûsummi kaŋ kuur. Ña mbi êenu'bu? Mbi êenu'pîya Ampawom amellhenom di hûlaama'uhe? Iyiy. Mata mo ma ikayumulom be di etaama'uye. 28 Ampoom, uga kañaanaku katayi ma kusali. "Na hûrimahu di hûcaalumul hatiya di emitay hammi: "Nîyyenoo'ban, mbi îyyiylankenool joon."

29 Ña buyooŋabu bata bukanaku kalakotom kajammi hurima'uhu, di kêenul kararanjuunaku. Be kaaku di kêenul amalaakaw omalobulom d'oo. 30 Be Jesus naaniil: "Hurima'uhe ha jijammi, hukaymuloot mata înje, be matawuul hukayumulom. 31 Mowme hukahu hata batalenabu bata etaama'uye hûriiŋe; moo âyyaw ata etaama'uye + nare ban kacahi d'oo.

+ 12.21 Filipi ume arebooraaw ata Jesus (Joŋ 1.43-44).

+ 12.31 Annahaanaw ata etamma'ue, oo aamom Esatanaay.

32 Mata na mbi ilhaalenlli di etaam, mbi iñakul bukanaku peh be baabu di înje." **33** Jesus ma aloom umu, oo âyiisem di êsukay maama mbi aket.

34 Ña buyooŋa'ubu bata bukanaku di keenool: "Ûli nujame kaan kûboñaku kâtooli keene, Kristu mbi alako to be nanoonan; moo mata wa nôonul Añool Ajamaat, mbi alhaaleni? Kama aymoom agam Añool Ajamaat?" **35** Ña Jesus naaniil: "Majaŋaamu muroŋ ute di miwuul kuka'uke; moo jirees di majaŋaamu kambi emuucenay esohuul, mata anaw areesem di emuucenay, âmiroriit ba areesem be. **36** Moo ma jironmi di jibaj majaŋaamu, jîynen mo, ma mbi jeeli jiga bukanaku kata mo." Na Jesus aloom umu, ban nakay ki âñooruwiil.

Jûdewwi kûynet Jesus

37 Be Palimo ma Jesus agam miñamu mata sembaasu sata Emitay lhay ma kujuk, be kûynentool poop; **38** ma meeli muga non ma añaŋenaaw ata kuboñaku kata Emitay aamom Isaiyas aloom âanul:

Ata Emit, aymoom âynemmi elobay yatoolaal?

Aymoom poop amanjum sembaasu satayi?

39 Momakiimom ma kêelitungmi kûynen, mata Isaiyas moo naloom joon âanul:

40 "Yoo egawiim kûpuum, di elhook poop uynumaw watayiil; ma atuba mbi kujuk,

ketukanamulen poop, ma atuba mbi kuwatatenooro, di ebuuneniil.

41 Isaiyas ma aloom umu, mata ma ajuum jâyyenaju jata Jesus, mo ma âlobummi matawool.

42 Be palimo moo, yahaanay yata jûdewwi kameeŋe di kûynen Jesus, be di kûkoli kaga ma bukanaku kûmii'mo, kambi fârisewwi kucah di buko di eluupay yata kâmebooraku katayiil. **43** Mata ma kuhammi mâkin kasalaku kata ejamaatay ma kuwaa'bo kata Emitay.

Jesus ehikitenumay yata etaamay

44 Ban Jesus naŋaŋulo ma âanuul: "Anaw âynenommi, untuwa înje nâynemmi, be anaw abollommi nâynemmi. **45** Anaw ajukommi, najuke anaw abollommi. **46** Înje majaŋaamu makaylom be ube di etaamay, ma an peh âynenommi, atubi alako di emuucenay. **47** Be anaw ajammi elobay yûmbaam, ban agawut non ma eloom, etubi igawool batalen, mata ikayloot bi iga êsukay batalen, be îkayil bi ipakeniil. **48** Moo, anaw alatommi ma ayabut elobay yûmbaam, anaw omu to ban a mbi agawool batalenabu; elobay ya iloom, yo ya mbi egawool batalenabu di hukahu hûbanumahu. **49** Mata elobay ya iloom, ekayumuloot di înje, be Ampawom abollommi omawulewommi wahaw wa mbi ilob, di poop waawu wa mbi ilhikiten bukanaku. **50** Ban nîmire kaan, elobay yatawool ya ega an abaj

eronj ay yâbaworiit. Mata wah kaŋ peh wa ilobem, wowa Ampawom añaaŋenewommi ma ilob.

Jesus nakullhen ûkandumaw wata kurebooraaku katawool

13 1 Ban na kâlundaayaku kata Paskuwa kuhuutum, Jesus ma âmiim ban kaan, tîriiŋe ma awaa'bo etaama'uye ma akay ki atoo'bo Ampawool. Be bâkinerabu ba âkimmi bukanaku kâynenoom kammi di etaamay, bo ba âkiniim be kaŋ di hûbanumahu. 2 Be na Jesus koo di kurebooraaku katawool kugam kokariyem sisonna, diyabu yoo ma egam ban di êsigiray yata Judas aamom añool Simoŋ Iskariyotis, hunongahu hata ma mbi aŋoon Jesus. 3 Be Jesus nâmiire kaan Ampawool omu ma awalemmi wahaw peh di uŋenaw watawool, nâmiire poop kaan di Emitay nâcaalhumulom, ban mbi alaañ be di yo. 4 Ña nalhaalo ta ya kurim, ma âcaalhen bûjupaabu, ban naŋar hûbeesoorumahu akok di hûkengahu. 5 Ban naŋar mumelamu aga di hûbasiyaahu ma akullhen ûkandumaw wata kurebooraaku katawool, ban nâbeesum wo hûbeesoorumahu ha akokom. 6 Ña na ârimmi di Simoŋ Pedru, Simoŋ Pedru narinkool aanool: "Ata Emit, aw mbi ukullhenom ûkandumaw?" 7 Be Jesus naanool: "Wahaw wa igawem di wo otubi unamulen wo mowme, be mbi uga ban nunamulen wo." 8 Be Pedru naanool: "Aw

otubi ukullhenurerom ûkandum." Jesus naanool: "Înje ikullhenti jaa ûkandumaw, otubi uga arebooraaw ûmbaam." 9 Ña Simoŋ Pedru naanool: "Ata Emit, kama ña otubi ukullhenom ûkandumaw keb, be mbi ukullhenom poop uŋenaw di hûkuwahu." 10 Be Jesus naanool: "Anaw akullhom ban, ajoonut ma akullho joon, be ûkandumaw keb mbi akullhen. Moo, miwuul poopuul jiseti ban, be anor ata di miwuul asetut. 11 Mata Jesus nâmiire jak anaw a mbi aŋoonool; mo ma âanummi ntuwa buko peh kusetum.

12 Na akullhemmi ûkandumaw wata kurebooraaku katawool ban, nâjupo bûjupaabu ma alaañ ki aleeho ta ya kurim, ban narinkiil aaniil: "Jinamulene wahaw wa igawuum?" 13 Miwuul ya jîwolom alhikitenaa, di jîwoolom poop Ata Emit; jikooŋe mata înje oo. 14 Moo, înje jagam alhikitenaa, niga poop Ata Emit, ikullhemmi ûkandumaw watawool, miwuul poop mbi ya kikulhenoor watawool. 15 Mata igawuu'mo, ma mbi ya jiga poop non ma igawuum. 16 Ma isallhenuul eenuul, agoroora alet ahammi anaw akiloom, bajut poop anaw aboñim, ahammi anaw aboñoom. 17 Moo, ma miiwuul jîmiim ban wahaw uwe, jiga wo jaa, mbi jibaj hûpiira.

18 Înje ilee'ma ilob matawool poopuul, mata nâmiire bukanaku ka ijotum, be mbi ga non ma demmi ma ŋiicim di Kaytaku Kâñooyyaaku kaan: 'Anaw a uriyem dânor,

omalhaalowlom ma atiikom.' +
19 Be ilobuul wahaw we mowme
 woo bariinorut, ma mbi uga, di
 jîynen kaan Înje Igam Înje." **20** Ma
 isallhenuul eenuul, anaw ayaañom
 anaw a înje ibommi, înje nayaañom;
 anaw poop ayaañuwommi, anaw
 abollommi nayaañom."

Jesus nañaagen di kaan Judas Iskariyotis mbi aņoonool

Mat. 26. 17-25; Mar. 14. 12-21;

Luk. 22. 7-13;21-23

21 Na Jesus aloom umu ban, ña
 naga ñankiiteni; ña naaniil: "Ma
 isallhenuul eenuul anaw aahu ata
 di miwuul mbi aņoonom." **22** Ña
 kurebooraaku katawool di kujikeroor,
 bâmirut anaw a Jesus alobem d'oo.
23 Be aahu a Jesus âkimmi noon, oo
 too ma âsikum ñata d'oo. **24** Ña Simoņ
 Pedru, nâlobum uņen arebooraaw
 umu, ma aanool arik Jesus anaw
 umu a alobem d'oo. **25** Ña arebooraaw
 umu, nâhug Jesus ma akagoor di
 êsigiray yatawool ma arinkool aanool:
 "Kama ay nulobem d'oo?"

26 Ña Jesus naanool: "Anaw a
 mbi iwul jîmburuwaaju jaboojenim."
 Ña naboojen jîmburuwaaju, ban
 nawuu'jo Judas Iskariyotis aņool
 Simoņ. **27** Na Judas atokonjom, ban
 Esatanaay di enebejool. Na Jesus
 nanool: "Wahaw wa ûkimmi uga,
 uga wo cab ma atuba upiyen." **28** Be
 bukaaku kalakotom huriyahu, an
 akeel anamulent wahaw wakiim

Jesus nâlobumoo'mo. **29** Be mata ma
 Judas aņakem bancaamabu batayiil,
 ña buko di kunoņ kaan Jesus
 aanoom ki ânoomul miñ makeel be
 kâlundaayaku, be mante bi kuwul
 kûsukateenaku. **30** Na Judas ayaam
 jîmburuwaa'uju, ban nâcaalh. Be
 tilay ma ajommi ban.

Kuboñaku kunkulaku

31 Be na Judas agam nâcaalhe, ña
 Jesus naniil: "Mowme Aņool Ajamaat
 mbi âyyeni, ma mbi bâyyenerabu bata
 Emitay poop bujuki d'oo. **32** Mata
 bâyyenerabu bata Emitay bujuki jaa
 d'oo, mbi ega poop ma bâyyenerabu
 batawool bujuki di yo; ban mbi ega
 mo mowme. **33** Kuñoolom, înje etubi
 ilako ute di miwuul kuk kayeje; be
 mbi jipaamom. Be non ma iloom
 yahaanay yata jûdewwi, moomu
 poop ma mbi ilobuul eenul, binabu
 ba ikayem be, jetubi jeeli jikay be bo.
34 Be mowme mbi iwuluul kuboñaku
 kunkulaku: mbi jîkinoor; non ma
 înje îkinuum, moomu poop kaņ ma
 mbi jîkinoor. **35** Jîkinoor jaa, mbi
 bukanaku peh kûmir kaan miwuul
 kurebooraaku kûmbaam.

36 Ña Pedru narik Jesus aanool:
 "Ata Emit, ûbey nureesem be? Jesus
 naanool: "Ba înje ireesem be, ooliit bi
 usoolhellom mowme; be mbi uga ban
 nusoolhellom. **37** Be Pedru naanool:
 "Mata wa ma êliitummi isoolheni
 mowme? Înje neeliye iket matayi."
38 Be Jesus nanool: "Aw mbi uket

+ 13.18 Sal.41.9

mata înje? Ma isallhene eeni, bala ulhitaaw ulhit jaat, aw balateromban ñeemo ñâhaaji."

Jesus oo agam buruŋabu

14 ¹ Ban naaiil joon: "Jîwaayen ma jîynen Emitay, di jîynenom poop. ² Mata eluupay yata Ampoom, ebaje sîwaanaatasu lhay; kaleteen mo, mbi eeneenuul ma ikay ki îbandoorul tiŋatu tatawuul. ³ Moo, na mbi ikay ki îbandoorul tiŋatu tatawuul, ban mbi îlaañul bi inŋaruul be baabu d'înje, ma nki ulawaal tanor. ⁴ Mata miwuul jîmire buruŋabu bata be ba ikayem be.

⁵ Ña Tome narinkool aanool: "Ata Emit, ma ûli ûmirutum ba aw ukayem be, bu ûli mbi uga ma ûmir buruŋabu?" ⁶ Be Jesus naanool: " Înje igam buruŋabu, niga malhegenumaayamu, di poop eroŋay. Mumulet bi an akay be baabu di Ampawom oo bayabumut d'înje. ⁷ Mata jîmireenommi, mbi jîmireen poop Ampawom. Be ma jijukommi, jîmiroo'ban.

⁸ Ña Filipi naanool: "Ata Emit, ûyisoli jaa ampayi, di bawo." ⁹ Be Jesus naanool: "Filipi, noo kaŋ niŋanu na oomaam tanor, ûmirortom be jaat? Mata anaw ajukommi, najuke Ampawom. Moo mata wa ma oonumem di mo, îyisuul Ampawom? ¹⁰ Kama ûynet kaan, înje omu di Ampawom, oo poop omu d'înje?" Mata elobay ya ilobem di miwuul, ntuwa yûmbaam înje humuumom, be Ampawom ammi d'înje akiyom,

mata oo ammi ma agawem di bugoroorabu ba igawem di bo. ¹¹ Jîynen non ma ilobuum kaan, înje omu di Ampawom, oo poop omu d'înje. Be palimo miwuul jîynent, be di jîyneneenom mata wahaw wa igawem. ¹² Ma isallhenuul eenuul, anaw âynenommi, mbi aga poop wahaw o înje igawem. Ban naaliye aga poop waawu wahammi wa înje igam, mata ma ikay be baabu di ampawom. ¹³ Mata wahaw peh wa jilhawum di kañaanaku kûmbaam, mbi iga wo, ma ampawom mbi asali mata Añoolool. ¹⁴ Malhegen jilhaw jaa wah wakeel di kañaanaku kûmbaam, înje mbi iga wo.

¹⁵ Moo nokoor jaa non miwuul ma jîkinommi, di jisoh elobay yûmbaam. ¹⁶ Înje mbi ilhaw Ampawo, oo mbi awuluul Aanenaaw aahu, a mbi alako di miwuul be nanoonan, ¹⁷ aamom Buynumabu balhegenumaayabu, ba bukanaku kata di etaamay keeliitum kuyab; mata keeliit kujuu'bo, keeliit poop kûmii'bo be miwuul jeeliye jîmii'bo mata bobu di miwuul.

¹⁸ Înje etubi iwalhuu'bo diyoonuul, be mbi îlaañul bi ilako di miwuul. ¹⁹ Mata letubi piyo, bukanaku kata di etaamay kebubi kujukom joon, be miwuul mbi jijukom. Mata ma înje emmi ma irommi, moou poop kaŋ ma miwuul mbi jiroŋ. ²⁰ Di huka'uhu mbi jîmir kaan înje omu di Ampawom, miwuul miwumu d'înje, înje poop înje omu di miwuul. ²¹ Anaw asoom kûboñaku kûmbaam, ban nagako di êsigiray yatawool, oo

âkinommi; moo anaw âkinommi, Ampawom poop mbi âkinool, înje poop nîkinool, ban nîyisool anaw a înje igam."

22 Ña Judas âbutim di Judas Iskariyotis, narinkool aanool: "Ata Emit, mata wa nuga ma ûli ujuki, be ugawut ma bukanaku kata etaamay kujuki?" 23 Be Jesus aanool: "Anaw âkinommi, ban nasoh elobay yûmbaam, Ampawom poop mbi âkinool, ûli mbi nûkayil be baabu d'oo ma ukin d'oo. 24 Anaw âkintommi, âsohoriit elobay yûmbaam; mata elobay ya jijamem di yo, ntuwa yûmbaam, be yata Ampawom abollommi.

25 Ma iñaanenuul wahaw uwe, mata înje umu ute di miwuul para. 26 Aanenaaw aamom Buynum Bunapaabu, a Ampawom mbi abolluul di kañaanaku kûmbaam, oo mbi alhikitenuul wah peh; mbi agawuul poop ma jiwollho wahaw peh wa iñaanenuum. 27 Jilako ute di kâsuumayaku; mata kâsuumayaku kûmbaam ka mbi iwuluul, etukawuluu'ko non ka ejabatay ewulem. Moo, jîwaayen ma atuba jîkoli. 28 Jijame non ma ilobuum, înje mbi ikay, be ban mbi îlaañul be ute di miwuul. Moo, jîkinom jaa, di jîririgen mata ma eenuum ma ikay be baabu di Ampawom, mata oo nahajom sembe. 29 Ilobuu'mo mowme bala wahaw uwu ûriiñ, ma mbi ûriiñ di jîyinen. 30 Moo, etunki ilob di

miwuul meen, mata annahaanaw ata etaamay uye, + nahuutulo ban, be abajut sembe d'înje. 31 Be jake ma bukanaku kata di etaama'uye, kûmir kaan înje nîkine Ampawom, momakiimom ma igawmem wahaw wa alobewommi. Na aloom umu ban naaniil: "Jilhaalo ma ûcaalhaal ute."

Buyaajabu bata uva di saanasu sata bo

15 1 Ban naan êsukay, înje, înje igam buyaajaabu balhegenumaayabu baaneyim uva, Ampawom naga awañaaw. 2 Moo, Saanasu peh sammi d'înje sâwolhoriitum mbi ampawom atii'so, saasu sawolhen nâkump so ma mbi sihanj mawolh. 3 Be miwuul jisete ban mata elobay ya iñaanenuum, 4 mata miwumu d'înje, înje poop, ijumu di miwuul. Non ma yaan âwolhoriitum yoo balet di buyaaj, moomu poop kanj ma jeeliitum jiwolh miwuul balet d'înje.

5 Înje buyaajaabu bata uva, miwuul saanasu. Moo anaw ammi d'înje, înje poop mbi êemi d'oo ban mbi awolh muriyaayamu huc, mata an aaliit aga maakeel înje banentool. 6 Anaw aleem d'înje mbi abeti non yaan ma alhaal ban di kuñaa'yo kuga di sambunasu ma ereem. 7 Be jêemi jaa d'înje ma jîyinen elobay yûmbaam, wahaw peh wa jikimmi ma jîlhaw wo, mbi jiyaa'wo. 8 Ban jiwolh jaa muriyaayamu huc,

+ 14.30 Annahaanaw ata etaamay uye, oo aamom Esatanaay (12.31).



Ampawom mbi asali, mata yîse kaan malhegen miwuul kurebooraaku kûmbaam. **9** Mata non ma Ampawom âkinommi moomu poop kaŋ ma îkinuum. Moo, mbi jîkinoor non ma îkinuum. **10** Moo, jisoo'jaa kûboñaku kûmbaam, ban di jenken di jâkinooraju jûmbaamaju, non ma înje poop isoom kuboñaku kata Ampawom, ma enken di jâkinaju jatawool.

11 Înje iñaanenuul wahaw uwe, ma êsuumaa yûmbaam mbi elako di miwuul, ma mbi êsuumaa yatawuul yeeli êrir. **12** Moo, kûboñaku kûmbaam kooke: mbi jîkinoor, non ma înje îkinuum. **13** Mata an alet a bâkinerabu batawool buhammi bata anaw awuum humuumahu hatawool ma aket mata kupaalool. **14** Moo, jiga jaa non ma iñaanenuum, di jiga kupaalom. **15** Ña etunki îwooluul joon non kugoroora, mata agoroora âmiroriit wahaw wa annahaanaw atawool agawem. Be înje mbi îwooluul non kupaalom, mata niñaanenuu'ban wahaw peh wa ijaammi di Ampawom. **16** Ntuwa miwuul jijotommi, be înje ijotuum

ma îwooluul ma jikay kijiwolh muriyaayamu, ma muriyaaya'umu mbi mulako to; ma Ampawom mbi awuluul wahaw peh wa jilhawum di kañaanaku kûmbaam. **17** Be wahaw wa mbi ilobuul: jîkinoor.

Burebooraabu bata Jesus, êsukay etubi êkiniil

18 Moo, bukanaku kata di etaama'uye kuraayuu'jaa, di jîmir kaan înje kusingum kuraay. **19** Mata gawemmi non miwuul di etaama'uye jiwoom, mbi kûkineenuul mata ma jîwoodom. Be ma gam înje ijotuum ma îcaalhelluu'dô, momakiimom ma kuraayuum, mata jigawut ban bukanaku kata dô. **20** Be jiwollho hurimahu ha ilobuum eenuul, agoroora ahaŋut annahaanaw atawool. Moo kuñaakoorom jaa, mbi kuñaakooruul poop, kuyaa'jaa hurimahu hûmbaam, mbi kuyab poop hatawuul. **21** Malhegen mbi kugawuul wahaw uwe peh mata înje, mata kûmirut anaw abollommi. **22** Mata ikayelootum, ban po ilobent di buko, ketubi kubajeen kûbajumiñ, be mowme ketubi kubaj kumelhoor mata kûbajumiñaku katayiil.

23 Anaw araayommi, Ampawom poop naraayum. 24 Mata igawentum wahaw uwe wa igam di tutaru tatayiil wa an akeel agaworutum, ketubi kubajeen kûbajumiñ. Be mowme kujuke wahaw wa igam, di kûraayoli poop ûli di Ampawom. 25 Be ga mo, ma mbi ga non ma ñiicim di kûboñaku katayiil kaan: "Kuraayom bakooñut." + 26 Be na mbi Aanenaaw a mbi îboñul âkayil, aamom Buynumabu bata malhigen a mbi âcaalhumul di Ampawom, oo mbi alob mata înje. 27 Be miwuul poop mbi jiñaanjen mata înje, mata miwumu d'înje kata kañ di hûcukumahu."

16 1 Ban Jesus naaniil joon: "Înje ilobuul wahaw uwe, ma atuba mbi kâynenaku katawuul kuweg. 2 Mata mbi kucah di miwuul di siluupasasata kâmebooraku katawuul; ban hukahu hôhareesewuum ha mbi anaw abujuu'ban, mbi âanul omagawem di bugoroorabu bata Emitay. 3 Mbi kugawuu'mo mata ma kûmirutolim ûli di Ampawom. 4 Moo, iñaanenuul mata wo ma mbi huka'uhu hûriiñ, mbi jiwolho kaan nilobeenu'mo ban. Be iñaanentuu'wo kata kañ niñanu, mata noo ulaal baroñaal tanor.

Bugoroorabu bata Buynum Bunapaabu

5 Be mowme ma ikay be baabu di anaw abollommi; be an akeel ata di

miiwuul, atubi arinkom ba ikayem be. 6 Be mata ma iñaanenum waha uwe, sîsigirasu satawuul silee'ma sîsummi. 7 Be ma ilobuul malhegen eenuul, hañ majak ma înje ikay, mata ikayut jaa, Aanenaaw atubi âkayil; be ikay jaa, nibolluwool. 8 Mata na mbi oo âkayil, mbi ahaat âmbasuk peh ma kunamulen mata kûbajumiñaku, di mata wahaw wacolum, di poop mata batalenabu ba Emitay mbi ega êsukay. 9 Malhegen oo mbi anamuleniil mata kûbajumiñaku, mata kûyinentom; 10 nanamuleniil poop mata wahaw wacolum, mata înje mbi ikay be baabu di Ampawom, ban jetubi jijukom joon. 11 Ban poop oo mbi anamuleniil mata batalenabu bata Emitay, mata annahaanaw ata etaama'uye, + natahi ban. 12 Be nibaje para wahaw lhaay wa mbi ilobuul, be jetubi jeeli jiyetor di wo maame. 13 Be na mbi Buynumabu balhegenumaayabu bûkayil, mbi bucolenuul wahaw walhegenumaayaw, mata betubi bulob mata bo, be mbi bulob mata wahaw wa bujammi, ban mbi buñaanenuul mata wahaw wâreesewuum. 14 Boo mbi buga ma isali, mata mbi bûñarul elobay yûmbaam, ban di buñaanenuu'yo. 15 Mata wahaw peh wa Ampawom abaam, wûmbaam; momakiimom ma eenumuum, mbi Buynumabu balhegenumaayabu bûñarul elobay yûmbaam, ban di buñaanenuu'yo.

+ 15.25 Sl. 35.19; 69.4 + 16.11 Annahaanaw ata etaama'uye, oo aamom Esatanaay.

Hûlaamahu di kâsuumayaku

16 Ban Jesus naaiil joon: "Letubi piyo jetukajukom, letubi piyo poop di jijukom joon." 17 Ña kurebooraaku kaaku katawool di kurinkoor ma kêenul: "Wa nâkimmi alobolaal, ma aanem di mo: Letubi piyo, otukajukaalool; ban letubi piyo poop, nujukaalool joon? Wa naloom umu mammi mbi akay be baabu di Ampawool? 18 Wa naloom umu poop mammi: 'letubi piyo'? Unamulentaal wahaw wa alobem di wo."

19 Be ma Jesus âmiim kaan kûkine kurinkool, ña naaniil: "Miwuul marinkoorem mata elobay ya ilobuum eenuul: Letubi piyo jetukajukom, letubi piyo poop di jijukom joon? 20 Ma isalhenuul eenuul, mbi jikaaw ma jilhoonooro, be bukanaku kata di etaama'uye, mbi kûririgen. Malhegen mbi jilhoonooro, be balhoonooruwerabu batawuul, mbi bulaañ buga êsuumay. 21 Anñaakanaw na mbi hûkahu hatawool hûriiñ, naga ñânkiiteni, be na mbi âcaalhul di añilaw, nâwuken hûlaamahu ha âlaamum, mata ma ajuum añilaw a âcalhom d'oo. 22 Moomu poop kañ ma miwuul jemmi ma jigam, mata mowme miwumu ma jilhoonooruwem, be mbi ilaañ joon ijukuul; mbi jîririgen noon, ban hûririgena'uhu an atubi aali âcaalhen ho di miwuul. 23 Na mbi huka'uhu hûriiñ, jetubi jirinkom makeel. Be ma isalhenuul eenuul, wahaw peh wa jilhawum Apawom di kañaanaku kûmbaam,

mbi awuluu'wo. 24 Be, be maame jilhaworut wah wakeel di kañaanaku kûmbaam. Mata jilhaw jaa, mbi jibaj, ma mbi jeeli jîririgen jak."

Etaamay yoyu di uñenaw wata Jesus

25 Ban Jesus naaniil joon: "Wahaw uwe wa ilobuum, ilobumuu'wo kaliikumaku, be hukahu mbi hûriiñ ha etubi ilobuul joon wah di kaliikum, be mbi ilobuul salh mata Ampawom. 26 Di kuka'uku di kañaanaku kûmbaam mbi jilhaw. Be ntuwa mbi ilhaw Ampawom matawuul. 27 Malhegen Ampawom nâkinuul, mata ma miwuul poop jîkinommi, momakiimom ma jîynenummi kaan d'oo nîcaalhumulom. 28 Malhegen baabu di Ampawom nîcaalhumulom ma îkayil be ube di etaamay, ban mbi iwaa'yo bo ma ilaañ be baabu d'oo."

29 Ña kurebooraaku katawool di keenool: "Mowme aw malobem salh, mata ulee'ban nûlobum kaliikum. 30 Mata mowme ûli nunamulene kaan aw nûmire wah peh, moo nki joonut ma an arinki makeel. Momakiimom ma ûli ûynenummi kaan aw di Emitay nîcaalhumulom."

31 Ña Jesus narinkiil aaniil: "Ña nkit jîynene? 32 Hukahu huhuute, be hûriiñe, na mbi jiwasoos poopuul ma anoowan aat be yañool, ma jiwalthom bo diyoonom. Be etubi ilako diyoonom, mata Ampawom omu d'înje. 33 Wahaw uwe ilobuu'wo, ma mbi jeeli jibaj kâsuumayaku mata înje. Mata di etaama'uye mbi

jîlaam, be jîwaayen mata înje nihaate ban etaamay."

Jesus nalhaw Emitay mata kurebooraaku katawool

17 ¹ Na Jesus alobiim umu, ban nalhag ma alhaw Emitay ma aan yo: "Ampoom, tîriiŋe; ûyyen Añooli, ma mbi oo poop âyyeni. ² Mata aw uwuloom sembaasu ma ahaŋ an peh, ma mbi aali awul eroŋ yâbaworiit bukanaku peh ka uwuloom. ³ Eroŋa'uyu yâbaworiitaay yoo yeemom uye: Ma bukanaku mbi kûmiri aw janoraw keb, jagam Emitay elhegenumaayay; di poop Jesus Kristu aamom a ubollom. ⁴ Mata înje nigawi ban êriibiinaay di etaama'uye; mata nîwuñene bugoroorabu ba awulommi iga. ⁵ Moo Ampoom, ugawom êriibiinaay too d'aw, yaamom ya ibajemmi noo d'aw bala etaamay êwweni.

⁶ Bukanaku kata di etaama'uye ka uwulommi, nîyisii'ban matayi; mata katayi, ban nuwulomiil, di kuyab hurimahu hatayi. ⁷ Moo mowme, buko kûmire ban kaan, wahaw peh wa uwulommi d'aw ûcaalhumulom, ⁸ mata na ilobiim elobay ya uwulommi, di kuyaa'yo; ban kûmire jak kaan d'aw nîcaalhumulom, ban poop kûynene kaan aw ubollommi. ⁹ Moo, înje nilhawi be bata bukanauke ka uwulommi, mata aw ukiliim, be ilhawut be bata bukanaku kata di etaama'uye.

¹⁰ Mata wahaw peh wa ikiim watayi; watayi poop wûmbaam, mata matayiil nîyyenumim. ¹¹ Mata înje etubi ilako ute di etaamay, mata ma îkayil bi itooki dô. Be buko koku ube di etaamay. Moo Ampoom anapaaw, bukanauke ka uwulommi upooyomiil di sembaasu sata kañaanaku katayi, ma mbi kuga anaw anoraw non ma ula ugawam anaw anoraw. ¹² Mata na ilakom ube di etaamay di buko, nipooyipooyiim di sembaasu sata kañaanaku katayi. Malhegen buko ka uwulommi, nipooyipooyiim, an akeel di buko aneput, be anor keb anepum a mbi anepeen, ma ga non ma Baŋiicerabu⁺ buloom matawool. ¹³ Be înje ma îkayul bi îtooki dô, be iñaanjen wahaw uwe di etaamay, ma mbi êsuumaay yûmbaam egawiil kûririgen noon. ¹⁴ Be ma iwuliim elobay yatayi, momakiimom ma bukanaku kata di etaamay sûumutiim buko, mata ma buko kuwolhut di etaamay non ma înje poop îwolhutudom. ¹⁵ Moo, înje ilhawuti ma ûcalheniil di etaama'uye, be ma upooyiil mata sembaasu sata majakutaamu. ⁺ ¹⁶ Mata buko ntuwa di etaamay kuwoom, non ma înje poop îwolhutudom. ¹⁷ Ugawiil ma kuga bukanaku kanapaaku di malhegen, mata elobay yatayi, elobay yalhegenumaayay. ¹⁸ Mata non ma ubollommi be ube di etaamay, moomu poop kaŋ ma înje iboñiim be âmbasuk peh. ¹⁹ Momakiimom ma

⁺ 17.12 Sl.41.9 ⁺ 17.15 Sembaasu sata majakutaamu, yaamo Esatanaay.

iwulumim eronjay yûmbaam pooyo matayiil, ma buko poop mbi kuga bukanaku katayi di malhegen.

20 Moo, ilhawut be batayiil keb, be be bata poop bukan kaaku ka mbi kûynenom mata elobay ya mbi kuñaaneniil, 21 ma mbi kuga anaw anoraw, non ma aw jagam Ampawom ommi d'înje, înje poop nêemi d'aw; ma buko poop mbi kuga anaw anoraw d'ula, ma mbi bukanaku kammi di etaamay kûynen kaan malhegen aw ubollommi. 22 Mata niwulii'ban êriibiinaay ya uwulommi, ma mbi kuga anaw anoraw non ma ûla ugawam anaw anoraw. 23 Ma înje mbi êemi di buko, aw poop nôomi d'înje, ma mbi keeli kusohoor jak di malhegen, ma bukanaku kammi di etaamay mbi kûmir kaan aw ubollommi, ban nûkiniil non ma ûkinommi. 24 Ampoom, nîkine ma bukanaku ka uwulommi kulako tanor d'înje, ma tiŋootiŋ ta ikayum di kujuk êriibiinaay yûmbaam ya uwulommi, mata ma ûkinommi bala etaamay ewweni. 25 Ampoom, aw jagam anaw alhegenumaayaw, malhegen bukanaku kammi di etaamay kûmiruti, be înje nîmiri; buke poop kûmre kaan aw ubollommi. 26 Mata înje igawiim ma kûmiri; be mbi igawiil ma kuhaŋ mâmiri, ma bâkinerabu ba ûkinommi, bulako di buko, înje poop nilako di buko.

Jesus di kusohool

Mt. 26.47-56; Mar. 14.43-50; Luk.

22.47-53

18 1 Na Jesus alhawum Emitay ban, di kûtip jaalaju jata Sedroŋ koo di kurebooraaku katawool ma kukay be kareb kaaku ta etoolay yemmi, kûriiŋ di kûleenjo'dô. 2 Be Judas a mbi aŋoom Jesus, nâ mire etoola'uyu, mata too ta Jesus kukayem kuk kameeŋe ki kûmeboor koo di kurebooraaku katawool. 3 Ña Judas nakay di kayoonaku kata esellooraay, di poop di bukan kaaku kapooyem eluupay yata Emitay ka yahaanay yata bumaanenaabu bata kûboñaku kata Emitay, di fârisewwi kuwuloom, ma kûkayil di sihikitenomasu, di kusoyaku, di wañaw be to di etoola'uyu. 4 Be ma Jesus âmiim wahaw wa mbi kugawool, ña nakay ki kupam ma arinkiil aaniil: "Kama ay jipaamem d'oo?"

5 Di keenool: "Jesus ata Nasare." Ña Jesus naaniil: "Înje ume." Be Judas anoomoom, oo too di buko. 6 Be na Jesus aaniim: "Înje ume, di kulaañ kujeeŋanda, ban di kulo di etaam. 7 Na narinkiil joon aaniil: "Jeene ay jipaamem d'oo." Di keenool: "Jesus ata Nasare." 8 Jesus naaniil: "Neenuu'ban înje ume. Ga jaa non înje jipaamem d'înje, ña jiwaa'bo buke ma kukay."

9 Jesus ma aloom umu, ma mbi ga non ma aloom âanul bukanaku ka ampawool awuloom an akel ata di buko aneput. + 10 Be Simoŋ Pedru oo

+ 18.9 Joŋ 6.39,17.12

too di kajaasiyaku. Ña nâlhiimuluu'ko ma alhib kâjaañayaku kûriraku kata agorooraaw ata annahaanaw ata bumaañenaabu bata kûboñaku kata Emitay aaneyim Malkus, natiiko.

11 Be Jesus naan Pedru: "Ulhiimen kajaasiyaaku katayi. Kama etubi isiben di jikoopaaju + jata hûlaamahu ja Ampawom awulommi?"

Jesus di kuñarool be baabu Anaas

Mt. 26.57-58; Mar.14.53-54;

Luk. 22.54

12 Ña esellooraay, di annahaanaw atayiil, di poop bupooyaabu bata jûdewwi, di kusoh Jesus, ban di kugenkool. 13 Ban di kusig kuñarool be babu Anaas, mata ma agam allhol Kayfas aganom annahaanaw ata bumaañenaabu bata kûboñaku kata Emitay kajaaña'uku. 14 Oo Kayfas, oo ma abiim bi alob yahaanay yta jûdewwi aaniil, hañ majak ma an anor aket mata êsukay. +

15 Ña Simoñ Pedru, koo di arebooraaw aahu ata Jesus, + ya kusunenool. Be mata ma arebooraaw umu kûmiroom di annahaanaw ata bumaañenaabu bata kûboñaku kata Emitay, ña di kuleeño koo di Jesus di hukaakahu hata eluupay yata amaañenaw umu. 16 Ña Pedru nalako ube tîyañ di êtingaay. Be arebooraaw umu a kûmiroom di annahaanaw ata bumaañenaabu bata kûboñaku kata Emitay, nâcaalhul ma

alhaw añakanaw apooyem êtingaay ma aga Pedru ma aleeño. 17 Ban añakanaw umu narik Pedru ma aanool: "Kama aw poop ntuwa ata di kurebooraaku kata âynaaw umu?" Be Pedru naanool: "Iyiy, înje igawut arebooraaw atawool."

18 Be ma jôobinom, ña bugorooraabu, di bupooyaabu kalakotom di kuyaben ma kûlhumbo. Pedru poop nalako to di buko ma ya kûlhumbo.

Anaas narik Jesus

Mt. 26.57-68; Mar.14.53-65;

Luk. 22.54,66-71

19 Ña annahaanaw ata bumaañenaabu bata kûboñaku kata Emitay, narik Jesus kurebooraaku katawool, di poop mata wahaw wa alhikitenem êsukay. 20 Be Jesus naanool: "Înje nilooloom way êsukay peh, ma ya ilhikiteniil di siluupasu satayiil sata kâmebooraku, di poop Eluupay yata Emitay dô jûdewwi kûmeboorem bâñoorowut. 21 Mata wa ma ûrinkumem d'înje? Urink bukanaku kajammi maama ilhikiteniim. Mata buko kûmire wahaw wa iloom.

22 Na Jesus aloom umu, apooyaaw aahu alakotom namabool kamiñaku di karaabaku, ban naanool: "Mo ma mbi ulob anahaanaw ata bumaañenaabu bata kûboñaku kata Emitay?" 23 Be Jesus naanool: "Ga jaa non nîlobikoorool, nûyisom

+ 18.11 Mt. 26.39; Mar.14.36; Luk. 22.42 + 18.14 Jonj 11.49-50

+ 18.15 Arebooraaw aahu ata Jesus alobim ute, Jonj.

maama îlobikoorum; be ga jaa non malhegenumaayamu niloom, moo mata wa numabom?" 24 Ña ban, Anaas naboñ Jesus di bagenkerabu, be baabu Kayfas aganom annahaanaw ata bumaanenaabu bata kûboñaku kata Emitay.

Pedru nalat Jesus joon

Mt. 26.71-75; Mar.14.69-72;

Luk. 22.58-62

25 Be Simoŋ Pedru oo too ma âlhumbuwem, di keenool: "Aw poop arebooraaw ata Jesus?" Be Pedru naaniil: "Iyiy, înje igawut arebooraaw atawool." 26 Agorooraaw ata annahaanaw ata bumaanenaabu bata kûboñaku kata Emitay, a kukiloorum di âynaaw a Pedru atiiim kâjaanayaku, naanool: "Kama înje ijukuti di etoolay miwuul d'oo?" 27 Be Simoŋ Pedru, nalat joon. Ña nownu kalhitaaku di kulhit.

Jesus di kuŋarool be baabu Pilatus

Mt. 27: 1-2; Mar.15: 1; Luk. 23: 1

28 Ban di kûcaalh di Jesus di eluupay yata Kayfas bûjomaru bîb ma kukay d'oo be di kâyyaku. Be na kûrimmi, kuleeŋowut di kâyyaku kambi kusikooro, + ma mbi keeli kuri kâlundaayaku kata Paskuwa. 29 Ña Pilatus nâcaalhul be tiyaŋ, âriiŋul naaniil: "Kama âynaaw ume wa nagawe wakiim di jiŋarumulool

be ute?" 30 Be di keenool: "Ga jaa non âynaaw ume agawet an âgece, otubi uŋarelliwool."

31 Ña Pilatus naaniil: "Jilaañ d'oo ma ki jigawool batalenabu non ma kûboñaku katawuul kuloom." Be jûdewwi di keenool: "Ûli ñôñoyi kabuj an." 32 Wahaw uwe uga, ma mbi ga non ma Jesus abiim bi alob mata eketay ya mbi aket. +

33 Ban Pilatus naleeŋo joon di kâyyaku, ban nâwool Jesus ma arikool aanool: "Kama aw âyyaw ata jûdewwi?" 34 Be Jesus naanool: "Ma urinkommi ume, aw unongumom kaŋ? Be mante bukanaku kulobim mata înje?" 35 Be Pilatus naanool: "Kama înje jûdew nigam? Êsukay yatayi, di yahaanay yata bumaanenaabu bata kûboñaku kata Emitay, kuŋalim ki kuwulom. Kama wa nugam?"

36 Be Jesus nanool: "Înje kâyyaku kûmbaam, ntuwa kata ube di etaamay. Gaween jaa non kata ube di etaamay, burebooraabu bûmbaam kutiik mata înje ma jûdewwi ketuba kusohellom. Be magam kâyyaku kûmbaam ntuwa kata ube, momakiimom."

37 Ña Pilatus narinkool aanool: "Kama aw âyyaw?" Be Jesus naanool: "Aw uloomom ôonul înje âyyaw. Mata momakiimom ma îwuwummi, ban poop mo ma ikayumulom be ube di etaamay, ma mbi eeli ilob êsukay

+ 18.28 Mata jûdewwi keeliit kûnebee'dô, mata dîŋa'ûdu bukanaku kagawuum jûdewwi kêndom. + 18.32 Joŋ 3.14; 12.32;Mt.29.19

malhegenumaayamu. Moo, an peh agam anaw alhegenumaayaw, mbi ajam hûrimahu hûmbaam."

38 Pilatus naanool: "Waywom wagam malhegenumaayamu?" Ña na aloom umu ban, nalaan ki aan êsukay: "Înje ijukut kûbajumiñ di âynaaw ume. **39** Magam di mûdeemaanamu matawuul, di kâlundaayaku kata Paskuwa, ya iwalheluul an anor akullim. Moo jîkine iwalhelluul âyyaw ata jûdewwi?"

40 Ña êsukay di kûñaanulo ma ya kêenul: "Ûli ûkint Jesus! Barabaas nûkimmi." Ban Barabaas oo anaw alesaaw.

19 **1** Ña Pilatus nanar Jesus, ban nagawiil ma kûnagulo. **2** Ña esellooraay di kucookoor êjambijaay yata undiinaw⁺ ma kugawoo'yo di hûkuwahu, ban di kûjupenool baanaabu. **3** Ban ya keenool: "Âyyaw ata jûdewwi, nusaapi!" Ban ya kumabool umiñaw di uraabaw.

4 Ña Pilatus nâcaalhul joon be tîyañ âriinul naaniil: "Jitallhen, ma îcaalheluwool be ube tîyañ, ma mbi jîmir kaan înje ijukut d'oo kûbajumiñ! **5** Jesus nâcaalhul oo ma ânkuuhenim êjambiyaay yata undiinaw, ban di kûjupenllool baanaabu. Ña Pilatus naaniil: "Âynaaw oomuwaal."

6 Be na yahaanay yata bumaanenaabu bata kûboñaku kata Emitay, di bupooyaabu bata eluupay yata Emitay kujukoom, ña

di kûñaanulo ma ya kêenul: "Uriinool di êkrusay! Uriinool di êkrusay!" Be Pilatus naaniil: "Miwuul jikay d'oo ki jiriinool, mata înje ijukut kubajumiñ d'oo." **7** Ña yahaanay yata jûdewwi di keenool: "Non ma kûboñaku kâtooli kuloom, âynaaw ume naaliye abuji, mata naane oo Anilaw ata Emitay."

8 Be na Pilatus ajammi ma kuloom umu, ña nahan mâkoli. **9** Ña nalaan anebej joon di kâyyaku âriin narink Jesus aanool: "Kama aw ûbey nuwoom?" Be Jesus alobut. **10** Ña Pilatus naanool: "Kama otukalob d'înje? Kama ûmirut kaan, înje nibaje sembe ma eeli iriin di êkrusay, neeli poop iwalheni?" **11** Be Jesus naanool: "Sembaasu sa ubaam ume d'înje, Emitay ewulisom, be anaw anarommi awuli, nabaje hûbajumiñaku hâamak."

12 Ña Pilatus ya apaam maama mbi aga ma awalhen Jesus; be jûdewwi ya kûñaanulo ma kêenul: "Na mbi uwalhenool, ûli nûmir kaan aw ûkint âyyaw âmakaaw ata Roma. Mata anaw ammi oo agam âyyaw, âkint âyyaw âmakaaw." **13** Na ajammi ma kuloom umu, ña nânarul Jesus be tîyañ, âriinul naleeho di hûtenkahu hata di kâyyaku kata batalenabu taaneyiim Gabata;⁺ di elobay yata ebrayku ya teene Gabata. **14** Be huka'uhu di ga no hukahu ha êsukay ebandoorem be kâlundaayaku kata Paskuwa; jaley ma arem poop kajuum, ña Pilatus naan

⁺ **19.2** Êkuuhaaw yata undiinaw: Undiinaw wariirim non ênkuuha.

⁺ **19.13** Gabata: Di baloberabu ebrayku dâamom tijatu tacookoorumim bawaaliisabu.

jûdewwi: "Âyyaw atawuul oome." 15 Ña jûdewwi di kûñaanulo ma ya kêenul: "Ûcaalhenool! Ûcaalhenool! Uriiŋool di êkrusay!" Be Pilatus narinkiil aaniil: "Âyyaw atawuul oo ma mbi iriiŋ di êkrusay?" Be yahaanay yata bûmaanenaabu bata Kûboñaku Kapiyaaku di keenool: "Ûli ubajut ây akeel âmakaaw, âbutim di âyyaw âmakaaw." 16 Ña Pilatus nawuliiwool ma nki kuriiŋool di êkrusay. Ña di kukay d'oo.

Jesus di kuriiŋool di êkrusay

Mat. 27.32-44; Mar. 15.21-32;

Luk. 23.26-43

17 Ña di kuga Jesus ma araaj êkrusay yatawool be tiŋatu ta keenem Kalvariya, di baloberabu bata ebrayku ya teeni Golgota. + 18 Na kûrintom, di kuriiŋool di êkrusay, di kuriiŋoor to poop kûynaaku egaba, aahu kaŋen kûrir, aahu kaŋen kumay ma Jesus atutuwiil. 19 Ña Pilatus naboñ ma kuŋiic di jitaaguwaaju baŋiicera'ube: "JESUS ATA NASARE, ÂYYAW ATA JÛDEWWI," ban di kuriiŋ jo hatiya di êkrusay da Jesus ariiŋim. 20 Be baŋiicera'ubu di buŋiici di elobay yata êbrewwi, di yata greguwi, di poop yata Latiŋ. Be ma gam tiŋa'utu ta kuriiŋum Jesus di êkrusay, totu ma tireekenoorum di hankahu, ña jûdewwi kameeŋe di kupisen baŋiicera'ubu. 21 Ña yahaanay yata bumaanenaabu bata kuboñaku kata Emitay di keen Pilatus: "Atuba uŋiic

umu ôonul oo âyyaw ata jûdewwi, be mbi uŋiic dô ôonul, âynaaw ume naane, oo âyyaw ata jûdewwi." 22 Be Pilatus naaniil: "Wahaw wa niŋiicum ban, niŋiicuwo ban!"

23 Na eselhooraay kuriiŋum Jesus, ban di kuŋar wañaw watawool kûgiiter ñeemo ñabakiir, ban di kuga anoowan naŋar jibeyaju jatawool. Be êsabadooraay yatawool, ekikuti ma eriirumuli hatiya be di etaam. 24 Ña eselloora'uyu di kêenul: "Atuba uruusulaa'yo, mbi ugawaal êtukay ma mbi ûmiraal anaw a mbi aŋaa'yo." Ña di coohen non ma Baŋiicerabu buloom kaan:

"Kûgiitoore wañaw wûmbaam, ban di kuga êtukay mata êsabadooraay yûmbaam." +
Mo ma esellooraay uyu kugam.

25 Be iñaaw Jesus oo too ñata di êkrusay, di atiyool, di Mariya aamom apañoor Klopas, di poop Mariya Madalena. 26 Be na Jesus ajuum iñaawool, koo di darebooraaw aahu atawool a aboolaatum, ña naan iñaawool: "Âwo, jaa añooli oomu!" 27 Ban naan poop arebooraaw umu atawool: "Jaa, iñaawi oomu." Ña noo huka'uhu, arebooraaw umu naŋar iñaaw Jesus be yaŋool.

Eketay yata Jesus

Mt. 27.45-56; Mar. 15.33-41;

Luk. 23.44-49

28 Ña na Jesus âmiim kaan wahaw peh ugawi ban, ma coohen non ma

+ 19.17 Golgota: Dôo deemom tiŋatu tata kusendaku. + 19.24 Sl. 22.18

Bañiicerabu buloom, ña nâanul: "Basibenabu bobu d'înje." + 29 Nownu êrungay too ma ememmi bunukabu bahiraabu, ña di kuñar jiponsaju ma kubojen jo di bunuka'ubu, ban di kukok jo di hunjaamahu, ma kuga jo di butumabu bata Jesus. 30 Be na acombubom, ña nâanul: "Wahaw peh ûrîre! Ban nâsik, ña naket.

31 Be mata ma huka'uhu hugam ha mbi tititijen di ga hîyyayahu hatayiil na mbi kâlundaayaku kata Paskuwa kuga, ña jûdewwi di kukay ki kulhaw Pilatus ma aga bukanaku ma kukay ki kutij ûkandumaw + wata bukanaku kariinim di sîkurusasu ma kuwalelliil, ma ketuba mbi kûlako dô huka'uhu. 32 Ña esellooraay di kukay kûriin di kutij ûkandumaw wata kûynaa'uku egabaay kariinooritom di Jesus. 33 Be na kûrimmi di Jesus, di kutookool oo ma akeem ban, ña kutijut ûkandumaw watawool. 34 Ña asellooraaw aahu nayawool kabaayaku di kaheehaku, ña hûsimahu di kûcaalhul, di kamelaku. 35 Anaw ajukoom, oo ma añaanemmi ume wahaw uwe; moo nâ mire kaan wahaw wa aloom ume malhegen, + ma mbi miwuul poop jîyinen. 36 Mata wahaw uwe uga mo ma mbi coohen non ma Bañiicerabu buloom kaan: "Yool yakeel yatawool yetubi etiji." + 37 Bañiicer baabu di beenul: "Mbi kujiker anaw a kuyam kabaayaku." +

Huhokahu hata Jesus

Mt. 27: 52-61; Mar. 15: 42.47;

Luk.3: 50-56

38 Ban Jose ata Arimateya agam arebooraaw ata Jesus, ban ya añaooroor mata ma âkolim jûdewwi, nakay ki alhaw Pilatus ma awulool buruñ ma âwalenul ehuluñaayay yata Jesus. Ña Pilatus naanool aawo. Ña Jose nakay âriin nâwalenul ehuluñaayay. 39 Nikodemus poop aamom abiim bi akay busonnaaru ki kujukoor di Jesus, + nanar sîkilaasu saalim sîriin anabawo di kunjen di hutok (35) sata mira, yâguusoorim di alowes. 40 Ban di kuñar ehuluñaayay yata Jesus ma kulhiimen yo sileesaasu, ban di kûliisen yo eheña'uyu non ma buko jûdewwi kugawem bata huhokahu. 41 Be tiña'utu ta Jesus ariinim di êkrusay etoolay too; di etoola'uyu poop êluñay dôo yunkulay da an ahokortim. 42 Ña Jose koo di Nikodemus, di kuñar ehuluñaayay yata Jesus, ki kuhok di êluña'uyu mata ma ereekentom, ban poop mata ma hîyyaayahu hatayiil hurem kâriin.

Jesus nâlhaalowul di kuketaaku

Mt. 28.16-20; Mar.16.:1-8; Luk. 24.1-12

20 1 Ban di hukahu hata kâcaalhaaku katayiil bûjomaru bîb, too bagaworut haa, Mariya Madalena, nakay be di êluñay, âriin najuk hûwaaliisahu ha kûbabummi

+ 19.28 Sl. 22.15 + 19.31 Ma Kutij ûkandumaw, ma mbi keele kûketaali.

+ 19.35 Jonj 20.31; 21.24; 1 Jonj 1.1 + 19.36 Sal. 34.20 + 19.37 Sal. 22.16

+ 19.39 Jonj 3.1,2

êluŋay, hoo ma hûcaalhenim. 2 Ña natey ki atoo'bo Simoŋ Pedru, koo di arebooraaw aahu a Jesus aboolaatum, âriiŋ naaniil: "Kûcaalhene ban Ata Emit di êluŋay, ûmirutaal ta kugawoom."


3 Ña Pedru di kûcaalh koo di erebooraaw aahu, ma kukay be di êluŋay. 4 Ña di kutey di manor, be arebooraaw aahu na haŋ Pedru ma tey cab, ña nasigool âriiŋ di êluŋay; 5 be na âhiinendom, najuk sileesaasu ma siwalenim, be anebejut. 6 Be Simoŋ Pedru a ya asoolhellow, nâriiŋul nanebej dô, oo poop najuk sileesa'usu. 7 Be eleesaay ya kugam di hûkuwahu hata Jesus, yoo baleet tanor di sileesaasu saasu, ma ebooniim bûto. 8 Ña arebooraaw umu poop asingum âriiŋ nanebej, na ajuumm, nâynen. 9 Be buko banamulenorut non ma Baŋiicerabu buloom kaan joone ma Jesus mbi âlhaalowul di kuketaaku. 10 Ña kureboora'uku katawool, di kulaañ be di siluup.

Jesus nâcaalhul Mariya Madalena

Mt. 28:9-10; Mar.16:9-11

11 Be Mariya nalako to di êtingaay yata êluŋay, ma ya akaaw. Be oo ma akaawem, nayiik ma ajiker hîndena di êluŋay, 12 ña najuk kumalaakaku egaba kâjupom tûmpaay koo ma kuleehom ta kutalum êhuluŋaayay yata Jesus, ma kuga aahu karebaku kata hûkowahu, aahu kata ûnkandumaw. 13 Ña di kurikool keenool: "Añakanaye, kama mata wa ma ukaawumem?" Naaniil: "Kukaye ban di Ata Emit ûmbaam, ban îmirut ta kugawoom."

14 Na aloom umu ban, nâtiwo kujeenanda, najuk Jesus ma ajummi, be anamulet kaan oo. 15 Ña Jesus narinkool aanool: "Añakaanawe, kama wa nukaawem di wo? Ay nupaamem d'oo?" Be oo di gawool non anaw umu, agorooraaw ata di etoolay, ña naanool: "Annahaanaw, ga



jaa non aw uŋaroom, nuñaanenom ta ugawoom ma ikay ki iŋarool." 16 Ña Jesus nanool: "Mariya!" Ña Mariya nâtiwowul ma aanool: "Raboni!" (dâamom "Alhikitenaaw".)

17 Be Jesus naanool: "Atuba usohom, mata iŋoolorut be baabu Ampawom, be ukay be baabu di kutiyom ki ooniil, ma iŋool be baabu di Ampawom, agam poop Ampawuul, aamom Emitay yûmbaam, yagam poop Emitay yatawuul." 18 Ña Mariya Madalena, nakay ki añaanen kurebooraaku katawool aaniil najuke Ata Emit! Ban nañaaneniil poop non ma aloboom.

Jesus nâcaalhul

kurebooraaku katawool

Mt. 28.16-20; Mar.16.14-18;

Luk. 24.36-49

19 Ña nawnu di kâcaalha'uku baheperabu, kurebooraaku katawool di kûmeboor dânor ma kubab sîtingaasu sata eluupay, mata ma kûkolim yahaanay yata jûdewwi. Ña Jesus nâcalhiil ma aaniil: "Kâsuumayaku kulako di miwuul." 20 Na aloom umu ban, nâyisiil uŋenaw watawool, di poop kaheehaku. Ña kurebooraaku katawool, di kûririgen mata ma kujuum Ata Emit. 21 Ña Jesus nalaan aaniil joon: "Kâsuumayaku kulako di miwuul! Mata non ma Ampawom abollommi, moomu poop kaŋ ma mbi iboñuul." 22 Na aloom umu ban, nâhuuteniil ma aaniil: "Jiyab Buynum Bunapaabu. 23 Moo, bukanaku ka mbi jibonket kûbajumiñaku katayiil, di kubonketi; be kaaku ka

jibonketutum kûbajumiñaku katayiil, ketukabonketi poop."

Bâynterabu bata Tome

24 Be Tome agam poop arebooraaw ata Jesus, ata di buku kunŋen di egabaay aaneyim poop Magabaamu, alakowut to di buko na Jesus akaylom. 25 Ña kurebooraaku kaaku di keenool: "Ûli nujuke Ata Emit." Be naaniil: "Ijikut jaa bayawerabu bata bariŋabu di uŋenaw watawool, îrurut poop jaa husinkahu hûmbaam di bayawera'ubu, ban îrurut jaa poop kaŋenaku kûmbaam di kaheehaku katawool, etubi îynen."

26 Na gam kukaku hutok di kûhaaji, kurebooraaku katawool di kulaañ kûmeboor joon, be Tome oo too di buko. Be nownu poop sîtingaasu soo ma sibabim, ña Jesus nâcaalhul tutaru tatayiil ma naaniil: "Kâsuumayaku kulako di miwuul!" 27 Ban naan Tome: "Tome, ujiker uŋenaw wûmbaam, uga husinkahu ute; uñuuruu'poop kaŋenaku katayi, ma uga ko di kahehaku kûmbaam; atuba uga anaw âynenoriitum, be uga âynenaaw." 28 Ña Tome naanool: "Ata Emit ûmbaam! Emitay yûmbaam!" 29 Be Jesus naanool: "Mata ma ujukommi mooma ûynenumommi? Be anaw ajukutommi, ban nâynenom, nabaje hûpiira."

30 Malhegen Jesus nagagam sîmanjumasu lhay sa kurebooraaku katawool kujuum, saŋiicutim di kayta'uke. 31 Be wahaw uwe woo uŋiicim, ma mbi jîynen kaan Jesus oo

agam Kristu, aamom Añoool Emitay; ma mbi jîynenool, di jibaj eronay mata kañaanaku katawool.

Jesus nâcaalhul kurebooraaku kaaku katawool

21 ¹ Ban Jesus nâcaalhul joon kurebooraaku kaaku katawool ñata hulhuwahu haneyiim Tiberiyadis. Na âcalhiim, ² SimoŃ Pedru, oo too koo di Tome, aaneyim poop Magabaamu, di Natanayel, aamom ata Kanaa yata Gâlileya, di kuñool Zebedew, di poop kurebooraaku kaaku katawool egaba. ³ Ña SimoŃ Pedru naaniil: "Ma ikay jambaalaju." Di keenool: "Ukayaal." Ña di kukay ki kumbaal, be hukaru uyu kaŃ peh, kusohut.

⁴ Na jaley atitijemmi, Jesus nâcalhiil di hûbereeraahu hata hulhuwa'uhu, be kurebooraaku katawool kumanjutool. ⁵ Ña narinkiil aaniil: "Kûñumooy, jibaje pîya wah wata huri?" Di keenool: "Iyiy, ubajut." ⁶ Ña naaniil: "Jîraac hûmbaalumahu karebaku kûriraku kata busaanaabu, mbi jibaj." Ña di kuraac ho bo, di kusoh siwolasu huc, poopii keeliit kûcaalhenuu'hô, mata ma hemmi huc siwolasu.

⁷ Ña arebooraaw aamom a Jesus aboolaatum, naan Pedru: "Ume Ata Emit." Na Pedru ajammi ma aloboom umu, ña nakoko humantaahu hatawool, mata akokuwent, ban nalo di mumelamu. ⁸ Ña kurebooraaku kaaku katawool, di kuŃar busaanaabu ma kuñakul hûmbaalumahu, mata

ma tiŃa'utu tîraagiyoorum di hûbereeraahu soŃo simeeterasu êteemeer (100), be hoo ma hemmi huc siwolasu. ⁹ Be na kugam kûcaallho tîyaŃ, di kujuk siwolasu soo di bagekabu bata sambunasu, di kujuu'to poop hûmburuwaahu. ¹⁰ Ña Jesus naaniil: "Jîbajul di siwolasu sa jisohulom."

¹¹ Ña Pedru nakay be di busaanaabu âriiŃ nâcaalhenul hûmbaalumahu, ban nâhuuluu'ho be di hûbereeraahu hoo ma hemmi huc siwolasu. Siwolasu sâlagaasu sâlakodom seemo êteemeer di bukanaku egaba di kunŃen di sîhaaji (153). Be palimo ma siyejum umu, hûmbaalumahu huruusulowut. ¹² Ña Jesus naaniil: "Jîkayil ma jiri." Ña di kumanj kaan oo Ata Emit, be an akeel asokent karinkool mante oo kaŃ. ¹³ Ña Jesus naŃar hûmburuwaahu di jiwolaju awuliil.

¹⁴ Be huka'uhu hugam hukahu hûhaajutahu na Jesus âcalhom kurebooraaku katawool na alhaalowulom di kuketaaku.

Jesus nalob di SimoŃ Pedru

¹⁵ Ña na kurim ban, Jesus narink SimoŃ Pedru aanool: "SimoŃ añoool JoŃ, nûkinom uhaŃ kupaali?" SimoŃ Pedru naanool: "Aa, Ata Emit, aw nûmire kaan înje nîkini." Ña Jesus naanool: "Ûteken sîgaraniinasu sûmbaam." ¹⁶ Ban narinkool joon aanool: "SimoŃ añoool JoŃ, noone

⁺ 21.20 JoŃ 13. 25

nûkinom?" Pedru naanool: "Aa, Ata Emit, aw nûmire kaan înje nîkini." Ña Jesus naanool: "Ûteken sîgaraniinaasu sûmbaam." 17 Ban narinkool joon hûhaajutahu aanool: "Simonj añool Jon, noone nûkinom?" Ña Pedru di mulaañool mata ma Jesus arinkoom ñeemo ñâhaaji mante nâkinool. Ña naanool: "Ata Emit aw nûmire wahaw peh; moo nûmire kaan înje nîkini." Ña Jesus naanool: "Ûteken sîgaraniinaasu sûmbaam." 18 Ban Jesus naanool: "Ma isallheni eeni, aw baronj di añil, ya ukoko ban nukay be ba ûkimmi; be na mbi uhallen, mbi uñuur uñenaw watayi ma an aahu akoki, ban nanari be ba ûkintum ukay. 19 Jesus ma aloboom umu, ma âysool eketay ya mbi Pedru aket, ma Emitay mbi esalhi. Ban naanool: "Usoolhellom."

20 Na Pedru âtiwowulom, najuk arebooraaw a Jesus aboolaatum, aamom akagoorunom di êsigiray

yata Jesus na kurim, + arinkoom mata anaw a mbi aḡoonool, ma âsoolhenewuum d'oo." 21 Ña na Pedru ajuum arebooraaw umu narink Jesus aanool: "Ume wa mbi ugawool?" 22 Jesus naanool: "Înje îkin jaa, nalako to baketut be na mbi îlaañul. Butumi wa bembo? Aw usoolhellom!"

23 Ña eloba'uyu di ewaasoor di bûyinenaabu di kaan, arebooraaw umu atubi aketurer. Be Jesus alobut mo, be âanul: "Înje îkin jaa, nalako to baketut be na mbi îlaañul, butumi wa bento?"

24 Arebooraaw umu omañaanemmi eloba'uye, ban nanjiic yo. Moo, ulaal nûmiraale kaan wahaw wa añaanemmi malhegen. 25 Malhegen wahaw wa Jesus agam uyeje noon, gaween jaa non ma uñiiceeni poowo, sîliibra'usu, nîynene kaan palimo di âmbasuk peh letubi baj tiñatu ta mbi sigaweeni.